

**Mamela, Morena o a bua!**

**Luister, die Here praat!**



***Die Gereformeerde Kerk Boskop***

1999

Potchefstroom

Copyright © 1999

Kereke ya Gereformeerde Boskop

**ISBN**

All rights reserved. No part of this publication may be reproduced in any form or transmitted in any form, whether electronically, mechanically, by photocopying or tape recording without the required written permission.

Cover design:

# Selelekela

## *Dikarolo tse pedi tsa Bible*

Lentswe la Modimo ke buka e makatsang. Ha se buka e tlwaelehileng. Ho Baheberu (4:12) ho eme hore ha se Lentswe le shweleng, empa le ya phela. Hape ha se Lentswe le fokolang, ke Lentswe le *matla*. Hape ha se Lentswe le monate-kaofela, empa ke buka e bohale. Mongodi wa Baheberu o re ha le tshwane le thipa e tlwaelehileng, ke sabole e ntlha di pedi. Le hlaba hare ho feta mmele ya rona. Le ahlola menahano le mehopolo e kahare ho dipelo tsa rona – moo le rona batho re sitwang ho bona teng. Ka baka lena, Bible ke buka e kotsi!

Homme jwale ka sabole e ntlha di pedi, le Bible e na le dintlha di le pedi: le ya kgalemela mme le ya otl'a, hape le ya kgothatsa le ho tshedisa. Motho a ka re le tshwana le mollo: le ka o tjhesa, hape le ka o futhumatsa.

Mo bukaneng ena ka dithero di le leshome o tla bona dikarolo tse pedi tsa Lentswe la Modimo. Re ithuta ho tswa ho lona hore re fetoleng maphelo a rona. Empa – ha re le mamela – le re aha le ho matlafatsa tumelo ya rona.

## *Letsibolo la phutheho e ntjha*

Ena ke bukana e ntshiwang ke phutheho e ntjha ka ho fetisisa kahare ho Klasisi ya Tlokwe. Kereke ya Gereformeerde Boskop e ikemetse ka Mopitlwe 1997. Ke phutheho e ratang ho phela haufi le Modimo.

Ke kahoo baholo le baevangedi hang – phutheho e sa ntse e le sedika sa Ikageng – ba ileng ba kopana hangwe ka beke nakong e ka etsang hora le metsotso e mashome a mararo ba etsa thuto ya Bible ho etsa dithero. Mokgwa oo re sebetsang ka ona ke o latelang:

## *Mokgwa wa rona*

- ❖ Ha re sena ho lemoha le bothata bo itseng phuthehong, re ne re tla batla temana tse ka re hlahisang lesedi hodima bothata bona.
- ❖ Re ne re leka ka mehla ho fana ka setshwantsho se amanang le bothata ( ka tsela yeo ditho di ka e utlwisang ha bonolo) ebe re e kopanya le karolo tsa thoto (mohlala: nalane e hlahang testamenteng ya kgale kapa e ntjha).
- ❖ Re ne re bala dikarolo tsena hammoho ka puo tse fapaneng (Sesotho, Seafrikanse le Senyesemane).
- ❖ E mong le e mong wa banka-karolo o ne a bolela seo a neng a se utlwisisa mo karolong e badilweng. Hammoho re tla leka ho batlisisa seo Modimo o re senolelang sona Lentsweng la Hae.
- ❖ Ka puisano ena ya rona re fihlela diqeto tsena tse latelang: (1) seo sehlooho e leng sona, kapa mohlo-dithero, (2) dikarolo tse tharo kapa tse nne tse ka fumanwang karolong eo (ho thusa ditho ho hopola thero ha bonolo) le (3) molaetsa bakeng sa rona le maemo a rona a bophelo.
- ❖ Moprofesara Bennie o ne a ngola fatshe dihlooho tsa ditaba tseo re neng re di bua, mme hamorao o ne a ngola thero eo mongodi wa hae, mof. Naomi Kotzè a neng a e tlanya. Hamorao ho etswa dikopi tse neng di arolelwa bohle.
- ❖ Ka Sontaha se latelang, ke hona baholo le baevangedi ba tla rerang dithero tsena tulong

tse fapaneng.

### *Katleho ya mokgwa ona*

*Katleho mokgweng ona wa rona hara tse ding e bile tse latelang:*

- ❖ Thero eo batho bana ba ileng ho e rera, ha se ntho e “sa tlwaelehang” eo ba ileng ho e fetisa. E bile karolo ya “mmele le madi” a bona ya pelo tsa bona.
- ❖ Dithero tsena ha se diqeto tsa motho a le mong, eo tsebo ya hae ya Lentswe e fokolang, empa ke mehopollo ya ba bangata. Hammoho re fumane maruo a maholo Lentsweng la Modimo ao ka bonngwe ba rona re neng re ke ke ra a fumana.
- ❖ Ho ne ho kgahlisa ho bona kamoo motho wa Bophirima (makgowa) le Moafrika (batsho) ba fapaneng hole kateng, ka ho bona mahlakore a matjha a evangedi mme ka mokgwa ona re thusana ho epa moepong wa Lentswe la Modimo.
- ❖ Dithero tsena ha di ya ema lefaufaung. Di ne di itshetleha hodima maemo le mathata a tsatsi ka leng a Boskop. Re ne re sa qeaqee ho kgalemela ho sebeletsa badimo, tshebediso e fosahetseng ya jwala, boitshwaro bo sa lokang le bobo bo bong bo bongata. Tsena e ne e se dithero tseo o neng o ka di rera ka ho tshwana Europa, Japane kapa tulong tse ding. (Re sebedisa lentswe lena: dithero di ne di itshetlehile hodima maemo le sebaka)
- ❖ Ka tsela ena phatlalatsa ya Lentswe e fihlela maemo a hodima.
- ❖ Ka tsela tsena tsohle motho o ne a kgona ho atleha ka ho etsa mosebetsi wa kaho o makgethe le wa semoya. (Phutheho ya rona ke ya batho ba sebetsang mapolasing mme bongata ha bo tsebe ho bala.) Mola ha ke eso ho bue kamoo ho etsa dithero tsena ho re matlafatsang le ho ahang kateng!

Re ya eletsa hle, sebedisang tsela e bonolo ena.

### *Bukana ena*

Dithero tsena di ngotswe ka Sekgowa ke moena Bennie. Moena Rantoa Letšosa (e mong wa baithuti sekolong sa boruti, eo e leng e mong wa ditho tsa rona) o ile a etsa kgetho ya dithero tse leshome mme a di fetolela Sesothong. Klasisi ya Tlokwe e ile ya ananela taba ena mme ya dumela hore bukana ena e phatlalatswe e fumanwe ke bongata. (Motho ya batlang dithero tsena ka Sekgowa di ya fumaneha ho moena Bennie van der Walt, Bezuidenhoutstraat 7, Potchefstroom 2531). Ke thapelo ya rona ha ho ka etsahala hore bukana ena e rekiswe hantle, e latelwe ke bukana ya bobedi!

Rwe qadile ka hore Bible e nale mahlakore a le mabedi:hlakore le leng le supa nna le wena ka monwana, le ya re qosa kahobane re sa mamele Modimo. Mme hape ke monwana o supang ka ho re hwehla, ho re bitsa, le ho re *mema*. Monwana wa bobedi o teng hobane letsoho la Modimo ha le batle ho re qeleta thoko. Le batla ho re holela ho Modimo. Empa ho phela haufi le Modimo, re tshwanetse ho mo hlompha le ho mo mamela!

Thapelo ya rona ke hore Modimo o hlohonolofatse buka ena, a e nee mapheo hore e fofele hole ho tlisa lesedi le tataiso, ho kgothatsa – ho matlafatsa tumelong, tshepong le leratong.

Rantoa Letšosa  
Le  
Bennie van der Walt  
(Bangodi)

Bitsong la sehlopha sa ho ithuta Lentswe

❖ Bahlabani ho isa qetelong (ho kenyeletsa le bangodi) ke bana ba latelang:

Isaak Makhousa  
Albert Mutavhatsindi  
Richard Ramalisa  
Daan Taljaard.

❖ Ba neng ba re thusa nakwana, ke ba latelang:

Gwashi Manavhela  
John Monaheng  
Nicodemus Raditsabeng  
Faans Steyn  
Jeremia Stona  
Hannetjie van der Walt.

# Vooraf

## *Die twee kante van die Bybel*

Die Woord van God is 'n wonderlike boek. Dit is nie 'n gewone boek nie. In Hebreërs (4:12) staan daar dat dit nie dooie, maar 'n *lewende* boek is. Dit is ook nie swaak nie maar *kragtig*. Verder is dit nie 'n soetsappige nie, maar 'n skerp boek. Die skrywer van die Hebreërs sê dit is nie eers soos 'n gewone mes met net een snykant nie, maar soos 'n swaard met twee snykant. Dit sny ook baie dieper as net ons liggame. Dit beoordeel die diepste bedoelings en gedagtes van ons harte – daar waar geen mens, nie eers onself nie, kan sien. Die Bybel is dus 'n baie gevaarlike boek!

Maar soos die swaard met sy twee kante, het die Bybel ook twee kante: dit vermaan en bestraf, maar terselfdertyd bemoedig en vertroos dit. 'n Mens sou kon sê dit is soos 'n vuur: dit kan jou brand, maar dit kan jou ook warm maak.

In hierdie bundeltjie met tien preke sal u hierdie twee kante van God se Woord ontmoet. Daaruit leer ons dat ons ons lewens moet verander, maar – as ons daarna luister – bou en versterk dit ook ons geloof.

## *Die eersteling van 'n jong gemeente*

Dit is 'n preekbundel wat deur die jongste gemeente in Klassis Tlokwe uitgegee word. Die Kereke ya Gerefomeerde Boskop het maar eers in April 1997 tot stand gekom. Dit is egter 'n gemeente wat naby God se Woord wil lewe. Daarom het die ouderlinge en evangeliste reeds – toe die gemeente 'n wyk van Ikakgeng was – gereeld elke week een aand vir 1 1/2 uur bymekaar gekom om saam Bybelstudie te doen en preke te maak. Die manier waarop dit gedoen is, was soos volg.

## *Ons metode*

- ❖ Na aanleiding van 'n konkrete probleem/probleme in die gemeente het ons na ('n) skrifgedeelte (s) gesoek wat vir ons lig op die vraagstuk kon gee.
- ❖ Ons het altyd probeer om 'n konkrete *verhalende* gedeelte (met 'n “storie”, wat die lidmate maklik sou kon verstaan) te kombineer met 'n meer *leerstellige* gedeelte (bv. 'n historiese gebeurtenis in die ou testament en 'n gedeeltes uit een van Paulus se briewe).
- ❖ Ons het die gedeeltes saam in verskillende vertalings (Sotho, Afrikaans, Engels, ens) gelees.
- ❖ Elkeen van die deelnemers het gesê wat hom / haar in die betroke gedeelte getref het. Saam het ons probeer vasstel wat God vir ons daarin wil se.
- ❖ Na 'n gesprek rondom die tafel het ons besluit: (1) wat die sentrale tema of onderwerp van die preek sal wees, (2) hoe dit in drie of vier hoofpunte ingedeel sou kon word (om die lidmate te help om dit te volg en te onthou en (3) watter toepassing ons sou maak.
- ❖ Prof. Bennie het tydens die besprekings notas gemaak, die preek daarna uitgeskryf en sy sekretaresse, mev. Naomi Kotzè, het die preek getik, waarna genoeg fotokopieë vir almal gemaak is.
- ❖ Eers die volgende Sondag kon die ouderlinge en evangeliste die preek op die verskillende preekposte gaan lewer.

## ***Die geslaagdheid van ons manier***

*Die voordele aan hierdie manier van doen is onder ander die volgende:*

- ❖ Die preek wat die mense gaan lewer, is nie iets “vreemds” wat hulle net gaan “aflewer” nie. Dit het deel van hulle eie “vlees en bloed” – van hulle harte – geword.
- ❖ Die preke is nie die resultaat van individue, wie se insigte in die Woord maar beperk is nie, maar van ‘n hele groep se gedagtes. Saam het ons groter rykdomme in God se Woord ontdek as waartoe ons elkeen op ons eie in staat sou wees.
- ❖ Dit was byvoorbeeld interessant hoe ‘n mens as Westerling (die blanke lede van die groep) en as Afrikaan (die swart lede) soms heeltemaal verskillende, nuwe kante van die Evangelie kon raaksien en mekaar so kon help om dieper in die ryk goudmyn van God se Woord te delf.
- ❖ Die preke het verder ook nie “in die lug gehang” nie. Hulle was toegespits op die spesifieke, konkrete, alledagse probleme van Boskop. Ons het byvoorbeeld nie gehuiwer om voorouerverering, drankmisbruik, onsedelikheid en nog baie meer dinge openlik aan te spreek nie. Dit was dus nie preke wat net so goed in Europa, Japan of Eskimoland gepreek sou kon word nie. (Die moderne term is: hulle was “gekontekstualiseerd.”)
- ❖ ‘n Volgende voordeel van hierdie metode is dat ons verseker is dat die Woordverkondiging in die hele gemeente op ‘n hoë peil is.
- ❖ Op al hierdie maniere kon ‘n mens dus werklik daarin slaag om deeglike, geestelike bouwerk by die lidmate van die gemeente te doen. (Ons gemeente bestaan hoofsaaklik uit arm plaaswerkers van wie baie skaars kan lees.) Hiermee het ek nog nie eers genoem hoe verrykend en opbouend die maak van die preemakers self is nie!

Ons beveel graag hierdie eenvoudige metode ook by ander gemeentes aan.

## ***Hierdie bundel***

Die preke is oorspronklik in Afrikaans deur broer Bennie uigeskryf. Uit die baie preke het br. Rantoa Letšosa (een van ons groep en ‘n teologiese student) ‘n seleksie van tien gemaak wat hul in Sotho vertaal het. Klassis Tlokwe het ons aangemoedig om dit wyer bekend te stel, sodat ons nou hierdie bundeltjie in Sotho vir die breë publiek aanbied. (Iemand wat in die oorspronklike Afrikaans preke belangstel, kan dit by br. Bennie van der Walt, Bezuidenhoutstraat 7, Potchefstroom 2531 aanvra.) ons hoop om dit – as hierdie eersteling goed verkoop – aanstaande jaar deur deel 2 te laat opvolg!

Ons het begin deur te sê dat die Bybel twee kante het: dit is aan die een kant ‘n vinger wat na jou en my wys, dit beskuldig ons omdat ons nie na die Here luister nie. Maar terselfdertyd is dit ook ‘n vinger wat wink, roep, ons *uitnooi*. Die tweede is daar omdat die Evangelie van Jesus Christus ons nie wil wegstoot nie. Dit wil ons nader trek. Maar om nader aan God te kan lewe, moet ons eers bereid wees om na Hom te luister!

Ons gebed is dat die Here hierdie boekie sal seën, dat Hy dit vlerke sal gee, sodat dit ver kan vlieg om vir baie mense lig en leiding te bring, troos te verskaf – sterk te maak in geloof, hoop en liefde.

Rantoa Letšosa  
En

Bennie van der Walt  
(Redaksie)

Namens die Bybelstudiegroep

❖ Die “bittereinders” was (behalwe bogenoemde redaksielede) die volgende:

Isaak Makhousa  
Albert Mutavhatsindi  
Richard Ramalisa  
Daan Taljaard.

❖ Die ander wat ons vir ‘n tyd lank of afwisselend ondersteun het, was:

Gwashi Manavhela  
John Monaheng  
Nicodemus Raditsabeng  
Faans Steyn  
Jeremia Stona  
Hannetjie van der Walt.



## Lenane

1. Mohlolohadi ya futsanehileng ka kabelo e kgolo ka ho fetisisa	1
2. Leleme la hao: karolo e nyane ya mmele ka matla a maholo	6
3. Baetapele ba sebetsang	9
4. Mekgwa e meraro ya ho keteka Keresemose	12
5. Phutheho, moruti le Modimo	14
6. Hlokomelang kamoo le ahang kateng!	18
7. Na le mamela baprofeta ba bohata kapa ba nnete?	22
8. Sebe ke tlolo ho Modimo le batho	25
9. Krete o boetse o re bulela menyako ya paradeisi (lehodimo)	27
10. A re tshaba lefu kapa re hlompha bafu?	31

## Inhoud

1. Die arm weduwee met die grootste kerklike bydrae	1
2. Jou tong: 'n klein liggaamsdeel met geweldige mag!	6
3. Dienende leiers	9
4. Drie maniere om kerksfees te vier	12
5. Die lidmate, die moruti en God	15
6. Pasop hoe julle bou!	18
7. Luister jy na 'n ware profeet of 'n valse profeet?	22
8. Sonde is 'n oortreding teen God en teen di emense	25
9. Christus maak ons pad na die paradys weer oop	28
10. Vrees ons die dood en vereer ons die dooies?	31

# **Mohlolohadi ya futsanehileng ka kabelo e kgolo ka ho fetisisa**

**Bala Malakia 1:6-14, 3:7-12 le Mareka 12:41-44**

Baena le dikgaitsemi

Bukeng ya Malakia, Modimo o biletsa setjhaba sa Iseraele ho sokoloha, o batla hore Baiseraele ba fetole maphelo a bona. Molato wa bona ke ofe na? O re ba mo qhekanyeditse (thetsitse) ka ho mo utswetsa. Seo ba ka beng ba se utsweditse Morena ekaba keng? Ba mo qhekanyeditse ka ho se mo nee mahlabelo a mo loketseng le hona ho mo ntshetsa mahlabelo a nyatsehang.

Mantswe ana a kgalemelang a Morena, a ntse a bua ka matla le rona, rona ba phutheho ena. Le rona re loketse ho sokoloha, hobane le rona re sitetswe Morena. Re tshepisa diranta tse kana ka kgwedi, bakeng sa dikabelo tsa kereke, empa ha re di ntshe. Re re, re futsanehile haholo, homme re sebedisa makgolo, diketekete tsa diranta bakeng sa mafu ha a hlahile malapeng a rona, le mabakeng a mang. Hape re reka le jwala bo bongata mafelong a beke ka tjelete yeo re ka beng re ntshitse le esong yohle bakeng sa dikabelo.

Morena Jesu ka sebele o tla ho rona, ho bua le rona a tiisitse. O bua le rona ka mosadi wa mohlolohadi. Motho ya neng a futsanehile haholo, a sena le monna ho mo hlokomela. Le mameleng hantle seo, a batlang ho re bolela sona ka dikabelo tsa rona kerekeng.

Re ka fumana dikarabo dipotsong tse nne tsa bohlokwa tse latelang:

**Hobaneng re tshwanela ho neha kereke dikabelo?**

**Re tshwanetse ho fana jwang?**

**Re tshwanetse ho fana ka eng?**

**Ho etsahalang ha re fana ka dikabelo ka mehla le ka botshepehi?**

**Hobaneng re tlamehile ho neha kereke dikabelo?**

Batho ba bangata ha ba utlwisisi hobaneng kereke e hloka tjelete. Empa ho etsa mosebetsi ofeng le ofeng ho hlokeha tjelete. Kereke e etsa mosebetsi wa Modimo. Hantlente ha re nehe kereke: empa re neha mosebetsi wa Modimo o etswang ke kereke.

Ho na le mekgwa e mebedi eo ka yona dikabelo tsa rona di ka thusang ho etsa mosebetsi wa Modimo; ke ka ho ntsha koleke ka sontaha ka nako ya tshebeletso le dikabelo tsa rona tsa

kgwedi le kgwedi, tse ngolwang ditekeng. Tjhelete ena e sebedisetswa eng?

Dikabelo tsa Sontaha di sebedisetswa batho ba futsanehileng phuthehong ya rona. Modimo ha a batle ho be le batho ba futsanehileng, ba hlokang dijo ho ja, kapa ba hatselang mariha, eleng ba hlokang diapara kapa dikobo tseo ba ka robalang ka tsona. Ha re sa hlokomele bafutsana, etlabe ha re bana ba Modimo ka sebele, le ha re ya kerekeng Sontaha ka seng.

Ho feta mona, dikabelo tsa rona tsa kgwedi le kgwedi ke tsa hore ho be le dijo tsa semoya ditafoleng tsa rona kgafetsa. Nakong ya jwale (phuthehong ena ya Boskop) tjhelete eo e lefa baefangedi le dikoloi tse pedi tse tsamaisang bona, baholo le lona phutheho, ho ya dibakeng tse fapaneng moo mosebetsi wa Modimo o ilo tshwarelwa teng. Tsatsi le leng ha re se re nale moruti, dikabelo di tshwanetse ho lefa moputso wa moruti. Hobane moruti a etsa mosebetsi wa Modimo ka dinako tsohle, ha a kgone ho etsa mosebetsi o mong jwaleka baholo le bahlanka hore a tle a iphedise hammoho le lelapa la hae.

Re ke ke ra kgona ho bitsa moruti ha jwale ka dikabelo tsa rona. Phutheho ya Noordbrug e santse e lefa baefangedi ba rona ba bararo le ditshenyehelo tsa rona tsohle tsa dipalangwa. Phutheho ya rona e santse e tshwana le ngwana ya sokang a tseba ho ikemela ho tsa ditjhelete, ya sokang a tseba ho ikemisa ka maoto a hae. Ho ke ke ha dula ho le jwalo ka mehla; ha ho motho ya ratang ho dula ele ngwana ya senang boikemelo.

Ntle ho tjhelete ya mabaka a mabedi a seng a boletswe, kereke e sa hloka tjhelete bakeng sa ditefello tsa Klassis Tlokwe le Sinode Middellande. Ho a hlokeha hore re lefe ditefello tse na hobane phutheho ya rona e sa ikemele ka boyona, ntle ho diphutheho tse ding tsa Gereformeerde.

Baena le dikgaitsemi, jwale le a utlwisisa ke hobaneng kereke le yona e hloka tjhelete. Ha re sa etse jwalo re sitisa mosebetsi wa Modimo ho tswela pele. Mme taba e jwalo ke sebe!

Re tshwanetse fana jwang?

Tsela le boinehelo boo re fanang ka bona di bohlokwa. Ha re mameleng hore tse ding tsa ditho tsa kereke ya rona di nahana jwang, le hore Modimo o lokisa jwang mokgwa o fosahetseng wa ho nahana hoo ha bona.

< Ba bangata ba re ba futsanehile haholo ho ka nehela. Mohlolohadi le yena o ne a futsanehile haholo. Empa o ile a fana ka seo a neng a na le sona, leha se ne se le senyenyane. (Bobedi fela ba seo mosebeletsi wa letsatsi a neng a se fumana). Ha re a tshwanela ho nahana hore seo re fanang ka sona se senyenyane. Morena Jesu o ile a fepa batho ba bangata ka ditlhapi tse pedi le mahobe a le mahlano!

< Batho ba bang ba re motho o iphepa pele, ebe ka se setseng o neha Modimo. "Ke tlamehile ho reka dijo pele, ke duele tjhelete ya sekolo pele, ke duele le *diinstalment* ya thepa ya ntlo kapa koloi..."

Mohlolohadi ya futsanehileng o fetola mawa. O nea Modimo a sa nahane letho ka yena - o fana ka bonnyane boo a neng a tlamehile ho iphedisa ka bona. O ne a kgona jwang? Na ka ho etsa hona o ne sa hloke boikarabelo na? Tjhee, o ne a tseba hore Modimo o tla mo hlokomela ha ena a phethisa boikarabelo ba hae ka ho ntsha kabelo ya hae.

< Tse ding tsa ditho di fana ka bonyane bo feteletseng

Ho Malakia 1:8, 13, 14 re bala kamoo setjhaba sa Iseraele ka nako eo, se neng se tlontlolla Modimo kateng, ka ho mo tlisetsa diphoofole tse fofetseng, tse kgathetseng, tse kulang, tse tshohadi (ha tse tona di le teng), - esitana le tse utswitsweng ho mo hlabela tempeleng ya Hae. Tshebeletso ya bona e bile tlwaelo feela, dipelo tsa bona di ne di le siyo moo.

Bibeleng re rutwa hore Modimo ha a lebelle ho tswa ho bohle ka ho lekana. O kopa ho ya kamoo re kgonang kateng, ho ya kamoo a re hlohonolofaditseng kateng. Kahoo ha a batle ho tswa ho rona ho ka re fetang. Ke kahoo re sa lokelang ho fana selemo ka seng ka ho tshwana. Ha re fumana ka ho fetisisa, re tshwanetse ho fana ka ho fetisisa.

< Hape ho nale ditho tse fanang hore di bonwe. Baholo le moruti ba tshwanetse ho bona hore ba fana jwang, le hore ke ditho tse molemo jwang kerekeng!

E ne le mokgwa/tlwaelo ya mosadi wa mohlolohadi. Ho wa kgonahala hore e be bahumi ba ne ba kgesa mohlolohadi eo mme ba ne ba tsheha ha ba bona bonnyane boo a bo ntshang. Empa Krete o re, mosadi wa mohlolohadi o fanne ho fetisa bohle! Hobane ho tswa ho tlang ha bona ba ntshite haholo, empa yena o fanne ka tsohle. Phapang e kgolo pakeng tsa ketsahalo tse pedi tsena.

< Hape ho nale ditho tse fanang hore di tle di buellwe ke ho hong. Ba sebedisa kabelo tsa bona jwaleka hoja ele tokisetso ya lepato kapa ho reka kolobetso ka yona kapa hore lebitso la hao le lona le hlahele bukeng ya kereke. Ba hopola hore ka ho sa ntshe dikabelo tsa bona, kereke e ke ke ya ba pata mohlala ba hlokaletseng. Ba bang ba nale mohopolo wa hore ha ba ntsha dikabelo, le ha ba sa tle kerekeng, ha ho nang, moruti o tla ba pata. Tlwaelo ena le yona e fosahetse. Mohlolohadi enwa o na a sa lebella ho kgutlisetswa letho. Ka baka leo, le rona ha re a tshwanela ho batla ho kgutlisetswa ho hong ho itseng. Re tshwanetse ho etsa hona, ka teboho le ka lerato.

< Hape ho ntse ho nale ditho tse reng ba utlwa eka ba a qobellwa. “Moholo o wa tena, e re ke ntshe kabelo/lekgetho ena, a tle a tswe ho nna”. Tse ding tsa ditho ha di sa tlele le kerekeng, hobane ba tshaba hore moholo o tla ba botsa ka dikabelo tse saletseng morao.

< Sehlopha sa bofelo sona sea a tshepisa, empa ha se ntshe dikabelo, kapa se fana ka ho honyenyane feela. Mona re leshano jwaleka Ananiase le Saffira (Diketso 4:32-5:16). Ketso ena bonahala jwaloka tlolo e eseng molato, empa Modimo o ile a otlala Ananiase le Safira ka lefu. Ba ne ba nale tokelo e tletseng ya ho abelo tsohle kerekeng. Empa ka baka la hore ba ile ba tshepisa tsohle, empa ha ba a fana ka tsohle, ba ile ba sitelwa Modimo haholo.

Se bohlokwa ka ho fetisisa keng? Moya o moholo oo re loketseng ho aba dikabelo tsa rona ke o jwang? A re akaretse. Tsohle tseo re leng tsona le tseo re nang le tsona, ke tsa Modimo. Ka baka lena ha a hloke letho la rona, hobane rona re ba hae. Ho bontsha teboho ya rona ho yena, re mpa re kgutlisetsa ho yena ka ho ntsha kerekeng, karolo ya lesome ya tsohle tseo re nang le tsona (R1.00 ho tswa ho R10.00 e nngwe le e nngwe). Ntshetso/kabelo ena ke pontsho feela, hobane bonneteng Modimo o batla pelo, e seng tjelete tsa rona. Baroma 12:1 e re: **“Kannete banabeso ke a le rapela hle ka mehauhelo ya Modimo, hore le ke le o beele mmele ya lona, e be sehlabelo se phelang, se halalelang, se kgahlisang Modimo; ke yona**

**tshebeletso e le tshwanetseng**". Ha re ka bula dipelo tsa rona ka nnete, mme ra dumella Moya o Halalelang ho aha kahare ho dipelo tsa rona, esitana le mekotla ya ditjhelete tsa rona, e tla buleha. Kahoo re tla fana ka bolokolohi, ka lerato, mme re sena boiketsiso leha bo le bong.

### **Re fane ka bokae?**

Ha ho hlokehe le hore re fane ka karabo mona, hobane motho eo maikutlo a hae a hlahophileng o wa tseba hore o loketse ho fana ka bokae?

Tabeng ya pele ha ho ye ka hore motho o ntsha bokae, empa ho ya ka hore motho o ntsha ka maikutlo a jwang. Ha maikutlo a hlwekile, le dintshetso tsa rona e tla ba tse molemo.

Tabeng ya bobedi re tla fana ka ho molemo ka ho fetisisa ho tseo re nang le tsona. Ho Malaki Modimo o re, Baiseraele ba ka se natse ho ntshetsa moetapele wa bona dimpho tsa nyatshehang. Empa Modimo, ba mo etsetsa bobo bo jwalo.

Maemo ana a newang moetapele, a tlamehile ho newa le kereke. Kereke bakeng sa ntshetsopele ya yona le phatlaletso ya Evangedi e hloka tjhelete. Kereke e hloka esitana le batho ba fanang ka nako tsa bona, matla le tsebo ya bona tshebetsong ya Modimo.

### **Ho etsahalang ha re fana ka botshepehi, ka nako tsohle, le ka bokgoni?**

Karabo hodima potso ena ke hore Modimo o a re hlokomela. Mohlohadi enwa o ile a lebala boyena le tsohle tseo a neng a tla phela ka tsona. **Empa Modimo ha o a ka wa mo lebala!**

Re bala ho Malakia kamoo Modimo o ileng wa tshepisa setjhaba lehlohonolo ka teng. O a ba phēphētsa e le ka nnete: O re: "Ntekeng". Ha ba ka tlisa mahlabelo a bona ka botshepehi, o tla ba nesetsa pula, mme o tla kgalemela sesedi hore se seke sa ba senyetsa dijo tsa lefatshe, mme morara wa bona o ke ke wa ba phutsetsa, hape dinaha tsohle di tla ba bitsa lehlohonolo.

Le dibukeng tse ding Modimo o ntse a fana ka ditshepiso tse jwalo: 2 Bakorinte 9:6-9 (bala mme o nahanisise mantwe ana): **"Ya jalang hanyenyane o tla kotulo hanyenyane, ya jalang haholo o tla kotula ka thabo. E mong le e mong a ntshe kamoo a seng a lekantse pele kateng, pelong ya hae; e seng ka ho swaba, leha e le ka ho kgannwa, hobane Modimo a ratile ya fanang a thabile. Mme Modimo o na le matla a ho le atisetsa neo e nngwe le e nngwe ya mohau, le tle le be le ho le lekanang kamehla nthong tsohle, mme le atelwe ke tseo le tlang ho etsa mesebetsi yohle e molemo ka tsona..."**

Phetholelo ya sena (ha re sa ntshe dikabelo tsa rona) ke thohako ya Morena, mme Haggai 1:5 o ngolla ditaba tsena: **"Le jetse haholo, empa le thothile hanyenyane; le a ja empa ha le kgore, le ya nwa empa ha le kgolwe, le a apara empa ha le futhumale; ya sebelletsang moputso, o o sebelletsa ho kenya mokotleng o masoba..."**

Baena le dikgaitsetsi, a re se keng ra ya lolololo ka taba ena. Ho hlakile ka seo Modimo o ratileng ho re ruta sona Lentsweng la Wona tsatsing lena. A re lekeng Modimo. Tlisang dikabelo tsa lona mme le boneng hore ho tla etsahala eng maphelong a lona. Modimo ha o bu

leshano. O tla le hlohonolofatsa haholo ho fetisa seo le se ntshetshang kereke ka kgwedi.

Amen!

# **Leleme la hao: karolo e nyane ya mmele ka matla a maholo**

Bala: Jakobo 3:1-12 le 1:26

Mohlodi-thero: 1:26

Baena le dikgaitsemi

Jakobo o bua ntho e hlokolotsi mohloditherong wa rona: “Ekare ha e mong hara lona a lekanya hoba o nale borapedi, mme a sa tlame leleme la hae, empa a ithetsa pelo, borapedi ba motho eo ke lefeela”. Batho ba bangata ba nahana hore leleme la bona le mokgwa oo ba buang ka ona ha ho ame borapedi ba bona. Tumelo ya rona ke yona e amanang le borapedi ba rona. Hohang ha ho jwalo. Modimo o batla re mo sebetse ka tsohle tseo re nang le tsona. E seng feela ka pelo, moya le botho le maikutlo, empa le ka mahlo, ditsebe, matsoho, maoto le leleme.

Taba ya bobedi eo Jakobo a e hatellang temaneng tsena tseo re di badileng, ke hore ha re ya tshwanela ho nyatsa maleme ana a rona. Ke setho se senyane ka matla le ka tshusumetso e kgolo. O ka bakela moena hao kotsi e kgolo ho feta seo o ka mo etsang sona ka sethunya! Ha se ka baka la hore leleme lona le fosahetse, re ntse re ka nna ra sebedisa maleme ana a rona molemong wa dintho tse ntle. Empa ele ka baka la hore leleme la motho, seo a se buang, se bua ditaba tse tebeleng tse kahare ho pelo ya hao. Ke lona le bontshang hore ya busang kahare ho motho ke mang. Ha e le Satane ya busang pelo ya hao, leleme la hao le eba mollo a hlahang diheleng ka sebele. Ha e le Modimo ya busang kahare ho pelo ya hao, o ka sebedisa leleme la hao molemong o moholo.

Baena le dikgaitsemi tla re mameleng seo moapostola Jakobo a se buang ka dintho tse tharo tsena ka leleme:

## **Matla a maholo a leleme**

### **Tshebediso e fosahetseng ya leleme**

### **Tshebediso e nepahetseng a leleme**

## **Matla a maholo a leleme**

Jakobo o sebedisa ditshwantsho tse fapaneng ho hlalosa ho se thapiswe ha maleme a rona. Ha re kenya ka hanong la dipere ditomo, re kgona ho di tsamaisa hohle mmo rona re ratang ho di lebisa teng! (Le kgomo e hloka matla ha re kenya nkong ya yona lesale.) E seng feela seketswana, empa le dikepe tse kgolo di tsamaiswa hantle ka lemati le lenyane.

Ka ditshwantsho tse pedi tsena, Jakobo o re hlalose ka moo setho se senyane sena se ka kgannang mmele ohle, moo ho kgonahalang, botleng kapa bobeng.

Ka setshwantsho sa boraro seo a se sebedisang o re hlalose ka moo se ka bang le tshusumetso le ditlamorao ka teng. Se tshwana le mollwana o monyane o ka tjhesang moru o moholo.



Hopola feela kamoo Hitler ka leleme la hae a ileng a baka Ntwa ya Bobedi ya Lefatshe ka hona. Kapa nahana kamoo lentswe le fosahetseng le ka qabantsha lelapa kapa phutheho e kgolo ka teng. Ke ka hoo Jakobo a reng leleme le ka hotetsa mmele kaofela.

Hammoho le Jakobo re ya makala haele moo re kgona ho busa le hona ho ruta dintho tse fapaneng ka teng, jwalo ka pere kapa ntja, eseng feela diphoofolo empa esitana le batho ba bang. Empa haele maleme a rona a a re hlola! Maleme a rona a jwaloka diphofoolo tse hlaha, tse tshwenyang, le tse botswa tse ka etsisang motho dintho tse sa lokang - mme hona ho re lebisa karolong ya bobedi.

## **Tshebediso e fosahetseng ya leleme**

Ha maleme a rona a hotetswa diheleng ke Satane, ho re lebisa dinthong tsena tse latelang: re a seba, re jana ka meno, re jana direthe, re a rohakana, re bua leshano, re etselletsa bang ka rona ka leshano, re tlamelletsa bang ka rona, re ka qolla le tse ding tsa bobo bo etsahalang. Ka mekgwa ena ha re sitelwe baena ba rona feela, re a itshitelwa ka borona, hobane re ya silafala kamoo Jakobo a hlalolang ka teng. Ka mokgwa ona ha ho botle le ha bo le bong boo re ka iphumanelang bona. Jakobo ka hona, o re temaneng ya borobedi, leleme ke bobo bo sa hlolweng, le tletse mahloko a bolayang. Jwaloka bohloko bo bong le bo bong bo bolayang, leleme le kotsi, le na le bohloko bo bolayang (tjhefu), bo sa kgoneng ho fodiswa. Leleme le ya kudisa.

Maleme a rona ha a ame feela kamano ya rona le baena, empa le ama esitana le kamano ya rona le Modimo. Ka leleme re ka sebedisa lebitso la Modimo ka ho tlaela, le ho hlapaola, esitana le ka ho thola ka lona ha re tlamehile ho paka Modimo ka lona.

Bothata ba Jakobo ka batho bao a ba ngollang ke hore ha ba phele hantle ka tokelo ya maleme a bona: ha jwale ha ba le ka kerekeng, ba boka le ho rorisa Modimo ka maleme a bona, ha morao ha ba tswile, ba rohaka bang ka bona! Le rona re ne re ka re: “Hona jwale ba a bina, neng neng ba a seba, hona jwale ba a rapela, hamorao ba a thetsana, jwalojwalo”.

Jakobo o boela a sebedisa ditshwantsho tse ntle tse pedi ho hlakisa taba ya hore ho phela bophelo ba pelo e ntlha-dipedi, ha ho a loka - jwaloka ha batho ba bangata ba kerekeng ba nahana. Sediba se le seng se ka se elle metsi a monate le a babang ka nako e le nngwe. Le sefate sa feiye se ka se behe ditholwana tsa morara kapa mohlwaare.

Kamoo motho a buang ka teng, leleme le tlisa taba jwalo. Ho wena ho ka shebahala eka ha le na phoso. Empa tadima mohlodi-thero wa rona: “Ekare ha e mong hara lona a lekanya hoba o na le borapedi, mme a sa tlame leleme la hae, empa a ithetsa pelo, borapedi ba motho eo, ke lefeela”. Le ha o ka ba kerekeng Sontaheng se seng le se seng, wa bala Bibe le ya hao le ho rapela ka nako tsohle, empa ha leleme la hao o sa le sebedise ka nepo, borapedi ba hao ke lefeela! Hobaneng? Kahobane mokgwa oo o sebedisang leleme ka ona, ha ho fapane hohang le borapedi ba hao, ke karolo ya borapedi ba hao. Mme hona ho re tlisa karolong ya boraro:

## **Tshebediso e nepahetseng ya leleme**

Kaofela re a tseba hore ho bolela eng ho sebedisa leleme ka mokgwa o nepahetseng. Hantle-

ntle re tlamehile ho etsa ho fapaneng le seo re se buileng ka ho sebedisa leleme ka mokgwa o fosahetseng: ho bua hantle ka batho ba bang, ho ena le ho ba seba le ho ba ja direthe, ho bontsha kananelo ho ena le ho jwetsa motho molomo ho tlala, ho hlohonolofatsa bakeng sa ho rohaka, ho bua nnete ho ena le ho bua leshano, jwalo-jwalo. Kahoo maleme a rona a tla be a sa hotetswa diheleng, empa a tla be a hoteditswe ho tswa lehodimong.

Moapostola Jakobo o boetse o re fa keletso e tjhatsi (1:19) hore re mameleng hantle pele re ka bua kapa hona ho teneha. (Sebui se seng se kile sa re: Modimo ha a re neha ditsebe tse pedi le molomo o le mong kante ho lebaka!) Monna a mamele mosadi wa hae, mme mosadi a mamele monna wa hae, bana, batswadi ba bona, batswadi, bana ba bona, ditho tsa kereke baholo le baruti, mme baholo le baruti ba mamele ditho tsa kereke. Sa bohlokwa ka ho fetisisa, re ithute ho mamela Morena, kerekeng hape le ka ho bala Lentswe la Hae. Esitana le ha re rapela, re se ke ra bua tsa rona pele ka ho bolela Modimo dintho di hana ho fela, tjee, a re tholeng pela Hae mme re mameleng seo Moya o Halalelang o re bolelang sona.

Empa le ha re ka etsa tsena tsohle, re dula re le batho ba sa phethahalang. Re kgeloha kaofela, ho bolela Jakobo (3:2). Esitana le baKreste ha ba bue nnete feela ka nako tsohle. Ke ntho eo re loketseng ho e amohela.

Kahoo a re fumaneng setshabelo sa rona ho Morena Jesu Kreste. Ha a ne a re lefela melato ya rona ka madi a Hae, o ile a swela le maleme a rona! Jwale ka maleme a rona re ka rapela hore Moya o Halalelang o re nee matla ho thapisa maleme a rona ho bua tse lokileng ka nako e loketseng, le ho thibe hore a se bue dintho tse fosahetseng. A re rapeleng ka mehla ho fumana matla a ho ba balatedi ba Kreste - ha a eso fose ka leleme la hae.

Baena le dikgaitsemi, ka borona re ke ke ra kgona ho fedisa bohloko bo bolayang le mollo o heletsang melomong ya rona. Ha feela kamano ya rona e le ntle le Modimo, re ka kgona ho thapisa maleme a rona mme ra a sebedisa tlotlisong ya Modimo le hlohonolotsong ya bang ka rona. Modimo a re thuse ho ba didiba tse kollang metsi a monate, a hlabollang ka nako tsohle. Eya ke yona tshebiso ya bobedi e kgolo, e ntle ya leleme!

Amen!

## Baetapele ba sebetsang

Bala ho Mareka 10: 35- 45

Mohlodi-thero Mareka 10: 43- 45

Baena le Dikgaitsemi, Evangedi ya Morena Jesu e ya fetola\lwantsha: Evangedi ena e fetola dikelello le mehopollo ya rona. Mohlala: re dumela hore dipolotiki le baetapele ba dikereke ke batho ba tlamehileng ho re busa mme rona jwaleka baahi le ditho re loketse ho ba hlompha le ho ba sebeletsa. Morena Jesu o re karolong ena, kganetso (opposite) ya taba ena ke yona nnete: ka mantswe a mang, baetapele ba motse kapa ba kereke ke bona ba tshwanetseng ho sebeletsa baahi le ditho tsa kereke. Modimo o batla baetapele ba sebeletsang. Ho rona puo ena e utlwahala jwaleka puo e ikganyetsang. Ka hoo a re hlahlobeng dintlha tsena tse tharo:

### **Mohlala wa baetapele ba lefatshe lena**

### **Mohlala oo barutuwa ba lokelang ho o beya**

### **Mohlala wa Krete oo re loketseng ho o latela**

### **Mohlala wa baetapele ba lefatshe lena**

Kreste le barutuwa ba Hae ba tseleng ho ya Jerusalema. Mme barutuwa ba tshwenyehile, hobane Krete o ba bolelletse ka bohloko bo mo emetseng. Ho bonahala eka barutuwa ba ntse ba lebelletse Mopholosi\Messia wa lefatshe le mmuso wa lefatshe lena. Tlase ba lesome le metso e mmedi ho ile ha tsoha kgohlano pakeng tsa bona hore ya bohlokwa hara bona ke mang. Ha ba na bolokolohi ba ho ka botsa Morena Jesu. Jakobo le Johanne ba etsa qeto ya ho ba ba pele ba ho kopa Morena Jesu ditulo tse ka pele mmusong wa hae, esere mohlomong barutuwa ba bang ba ba tlolela pele. Ho ya ka buka ya Mattheu ha se barutuwa ba babedi bana, Jakobo le Johanne ba entseng kopo ena ho Jesu, empa e ne e le mma bona. O ne a batla ho etsa bonnete ba hore ke bara ba hae ba babedi ba tla dulang letsohong le letona le le letshehadi la Jesu ha a se a busa jwaleka Morena wa lefatshe lena.

Le rona re etsa jwalo matsatsing ana a kajeno. Batswadi ba nang le tshusumetso ba etsa hore bana ba bona ebe bona ba fumanang maemo a phahameng, mme ba leloko ba hlokomela maloko a bona pele. Sebe sena ke seo ka sejahlapa ho thweng ke “*nepotism*”. Tadima mokgwa oo barutuwa bana ba behang kopo ya bona pela Jesu: “Moruti, re rata ha o ka re etsa seo re tla se kopa”. Taba ena ha e utlwahale e na le boikokobetso kapa boinyatso. Ba etsa Jesu mosebeletsi wa bona - ho ena le hore e be bona basebeletsi ba Hae. Ba etsa hona hoba e le batho ba lebeletseng maemo a hodima, banna ba ratang ho busa hodima dihlooho tsa ba bang. Barutuwa bana le jwale ha ba eso ho utlwisise letho la Evangedi ya nnete ya ho sebeletsa mong ka wena. Krete o re ho bona, ba tshwana le batho ba lefatshe lena. Batho ba busang batho ba bang mme ba sebedisang matla a bona ka mokgwa o fosahetseng.

Baena le dikgaitsemi, ha re fete Jakoba le Johanne ka bokgabane. Baholo ba kereke ba iphile borena hodima ditho. Moruti ha a kgotsofale ha lekgotla le sa etsa ho ratwang ke yena. Monna o busa mosadi, ha mosadi lehlakoreng le leng a dutse monna hodima hlooho. Hape o fumana ditho di sa sisinye leha e le monwana ho etsa letho ka kerekeng. Ba re: “Athe ha re a kgetha

moruti, baholo le bahlanka ho phetha mosebetsi kaofela na?”

Re bona kamoo batho ba lwanelang maemo a boetapele kateng. Eseng ho sebetsa, empa e le feela hobane ba fumana monyetla wa ho ba barui (ka ditjhelete tseo ba di fumanang). Ke batho ba maemo, ba sa tsotelleng bafumanehi, bakudi, le ba se nang mosebetsi.

### **Mohlala oo barutuwa ba lokelang ho o beya**

Ha barutuwa ba bang ba lesome ba utlwa ka kopo ena ya Johanne le Jakobo, ba ile ba teneha. Mohlomong ho ba kgahlanong ha bona, ha se ka baka la hore Johanne le Jakobo ba entse kopo e fosahetseng, empa e le ka baka la hore ba ne ba hlalositse ditabatabelo tsa bona. Tabeng ya pele, Jesu o re ba babedi bana ha ba tsebe seo ba se kopang. Hobane ha ba rata ho rena monyakeng wa Hae, kapa mmusong wa Hae, ba tla lokela ho hlokofoatswa le yena ( ho nwa senwelo sa Hae). Ha ba elellwe hore tsela ya Krete le tsela ya modumedi e mong le e mong, ke tsela e bohloko empa e isang monyakeng. Kantle ho bothata, ha re fihlelle monate.

Tabeng ya bobedi, Morena ha a kgalemele feela Johanne le Jakobo, empa o kgalemela kaofela ha bona: **“empa ya ratang ho ba moholo kahara lona, e tla ba mohlanka wa lona; empa ya ratang ho ba wa pele hara lona e tla ba mofo wa bohle”**. Ona ke molaetsa o fetolang ka e le ka nnete. Ha o rata ho ba moholo le ho ba bohlokwa, o be monyenyanane mme o nyatsehe. Ha o rata ho ba wa pele, o ikemisetse ho ema moraora ho bohle! Molao wa mmuso wa lehodimo o fapane haholo le wa batho lefatsheng. Ha ho phoso ha batho ba bang e le baetapele, mme ba bang e le balatedi. Lefatsheng, re fumana baetapele le balatedi, kerekeng re fumana lekgotla le ditho tsa phutheho, mosebetsing re fumana motsamaisi le basebeletsi. Empa se fosahetseng ke ha baetapele bana ba eba babusi mme basebeletsi ba eba bahlanka ba bona. Ho ya ka lefatsheng motho a ka ba moetapele, kapa mosebetsi (basebetsi ba busang). Ee, ba ka busa, empa ba se ke ba hatella batho, ho ba ja, le ho ba qeta, empa ba ba sebeletse. Pusong ya bona ba tshwanetse ho tshehetsa le ho thusa bang ka bona.

Baena le dikgaitse, ke molaetsa o makatsang oo ho seng ba bangata ba o utlwisang. Motho a ka busa le ho sebetsa jwang ka nako e le nngwe? Tlo re etseng mehlala:

Baetapele ba rona - kaofela ha rona re loketse ho ikokobetsa ka ho fetisisa. Ho etsa hore ba bang ba be le tswelopele. Ha re ka etsa hona, mme ra ikemisetse ho dula morao ho bohle - Modimo o tla tla ka sebele ho re dudisa pele. Bao ba lo dulang pele ka bobona ho ya ka maemo a bona Modimo o tla ba dudisa morao.

Re se ke, le ka mohla, ra re mosebetsi o a nyatseha ho ka etswa ke rona, ka baka la maemo a rona. (Ho na le batho ba nahanang hore mosebetsi o itseng ke wa batho ba maemo a itseng, hona ha ho a loka.) Ha se mosebetsi wa moruti kapa moholo, ha hona maemo kapa mafapha ka kerekeng a bohlokwa ho fetisa a mang. Pela Modimo, re lekana kaofela.

Ha ntho e tlamehile ho etswa, ho ka se thuse ha re dutse re shebane mahlong. Ke boikarabelo ba bohle qetellong pela Modimo. A e mong le e mong a utlwe e le tokelo ya hae ho ntsha bokgoni ba hae. Re se ke ra hana ka nako ya rona, tshebetso le ditjhelete tsa rona. Ha re le baetapele, e mong le e mong wa rona ke moetapele nthong e itseng. A ho seke ha etsahala le ka mohla hore motho a sebedise boetapele bona ka mokgwa wa ho iphahamisa yena le ba habo, le ho kgesa batho ba bang. Ho ya ka Krete, ho ba moetapele wa nnete ha ho ye ho ikgopola

bowena, empa ho ya ka batho bao moetapele enwa a sebetsang ka tlasa bona. Ho re tlisa tabeng ya bofelo:

### **Mohlala wa Kreste oo re loketseng ho o latela**

Kreste o hopotsa barutuwa ba Hae ka bophelo ba Hae. Ha a tla lefatsheng ho tla sebeletswa empa e le ho sebeletsa. Evangeding ya Johanne re rutwa kamoo Kreste a ileng a kgumama ka mangwele a Hae mme a hlatswa maoto a ditshila a barutuwa ba Hae. Qetellong o ba hopotsa bohle hore: **“Hobane ke le beetse mohlala, hore le etse jwalokaha ke le entse”**.

Ho baFilipi 2:5-7 re bala mantswa ana: **“Le fele le be le pelo e bileng ho Kreste; eo leha a ne a ema ka sebopeho sa Modimo, a sa ka iketsa ya lekanang le Modimo; athe o ipheditse ka ho nka sebopeho sa mohlanka, ka ho iketsa ya tshwanang le batho”**.

Kreste o tlile ho re sebeletsa ka botlalo moo e bileng a fanne qetellong ka bophelo ba Hae sefapanong. Ke mang ho rona ya ikemiseditseng ho ba mosebeletsi ya tjena?

Ke kahoo lengolo lena le re tlisang dinthong tse pedi: a re ipoleleng melato, mme re rapelleng matla a tswang hodimo. A re ipoleleng molato wa hore re hana ho ba basebeletsi ba ba bang. Re batla ho ba bengahadi ka borona. Boinyatso le boikokobetso ke ona mkgwa feela wa ho kena mmusong wa lehodimo. Ee, a re rapelleng hore Moya o Halalelang o re fe matla hore ka tsatsi le leng re itekole re tle re tsebe ho latela mohlala wa Kreste.

Baena le dikgaitsemi, fadimehelang ka nako tsohle MOSEBELETSI yo moholo, le tle le tsebe ho ba basebeletsi ba banyenyane. Mme le ke ke la tshwenyeha hore na ebe le tla ba le karolo le ho kena moqoqong wa mmuso wa Morena wa lehodimo le lefatshe.

Amen!

## **Mekgwa e meraro ya ho keteka Keresemose**

Bala Mattheu 2:1-12

Baena le dikgaitsemi, mo karolong eo re e badileng, re lemoha mekgwa e meraro ya ho tadima Keresemose:

**Batho ba babe ba sa mameleng Morena Jesu, ba a tshaba**

**Batho ba sa tsotelleng, ha feela ba keteka matswatsi a tswalo a monate**

**Batho ba lakatsang Keresemose (ka mantswa a mang: ba lakatsang Morena Jesu ka sebele, monga letsatsi leo)**

Ho dihlopha tse pedi tse qalang, Keresemose ha se mokete wa ho hopola ho tla ha Krete lefatsheng. Taba ena e hopolwa ke sehlopa sa boraro feela. Ka baka la hore ditho tsa Kereke di ka nna tsa wela sehlopheng se seng le se seng ho tse tharo tsena, a re tadimisiseng kamoo dihlopa tsena di senolwang kateng Bibeleng. Re tlamehile ho ipotsise ka botshepehi, hore dihlopheng tse tharo tsena, nna ke wela sehlopheng sefe?

**Batho ba babe ba sa mameleng Morena Jesu, ba a tshaba**

E se e ka ba selemo kapa lemo tse tharo kamorao ho tswalo ya Jesu. Kantle ho badisa le batho ba bang ba dikarolo tsa Betlehema, ha se batho ba bangata ba tsebang ka taba ena e hlalileng. Modimo o tla etsa bonnete ba hore ditaba tsa tswalo ya Mora Hae di tsebahatswe ka bophara. E seng feela dinaheng tsa baJuda, empa le dinaheng tse kantle.

Balepi ba dinaledi bao e neng e le bahedene, ba ne ba kgothala hore metswamao ya dinaledi hole mane lehodimong, e bolela se etsahetseng lefatsheng lena, kapa se tla etsahalang nakong e tlang. Ke kahoo ba neng ba lekodisisa dinaledi tsena ka nako tsohle. Jwang, ha re tsebe, empa Modimo o bua le batho bana ba ditumelo tse thoko, ka puo ya dinaledi, yeo ba e utlwisang. Ba bona naledi e ba lemotshang hore ho na le Morena ya tswaletsweng baJuda. Kananelong ya bona, ha ba ka ba re tsena ke ditaba tse monate, mme ba di ngola dibukeng tsa nalane. Tjhee, ka baka la hore ba ne ba sa tsebe Modimo wa nnete, pelo tsa bona di ne di kgathatsehile. Ba etsa qeto ya ho ya batla Morena yeo, ya tswetsweng, ka bobona.

E ne e se taba e bonolo. Ba ne ba kene leetong nako e telle, mohlomong, eseng kantle ho tshoso ya dinokwane thoko ho tsela le dibata tsa naha. Empa le ha ho le jwalo, mantsiboa, ka kganya ya naledi, ba bonesetswa tsela ho ya Jerusalema, motse o moholo wa Bajuda. Tulo yeo marena a maholo jwaloka Davida le Solomone a neng a dula teng. Ke moo kgosana e tla bang teng. Baena le dikgaitsemi, balepi bana ba baheteni, ke mohlala ho rona. Dipelo tsa bona di ne di tuka malakabe a mollo ho ya bona Jesu. Eseng ho mo kopa ho hong. Empa e le ho mo kgumamela jwaloka Morena. Dikamele tsa bona di ne di tletsi dimpho tse theko e hodimo, ho mo neya tsona. Ha re keteka Keresemose re nahana feela ka dimpho tse rona re tlo di amohelang kapa tseo re tlo di rekelang bana ba rona. Re ya lebala hore ke letsatsi la tswalo ya Morena Jesu.

Morena Jesu o lokela ho fumana dimpho ho tswa ho rona. O batla ntho e le nngwe ho tswa ho rona. Dipelo tse nang le teboho, dipelo tse tletseng lerato.

Ha ba fihla Jerusalema, taba tsa Morena e motjha di ile tsa makatsa baahi haholo. Ha ba tsebe Morena wa Bajuda e mong, kantle ho Heroda, eo ba neng ba sa mo rate. Mme ka maswabi a maholo ho balepi, ha ho motho ya neng a tseba ka Morena Jesu. Ho morena ya kgohlahetseng, Heroda, ditaba tsena di ile tsa tlisa matshwenyeho le tshabo. Ha ho tswetswe Morena o motjha, ho tjho ho re borena ba hae bo tsietsing!

Baprista ba baholo le bangodi - baetapele ba kereke le ditsebi tsa Lentswe la Modimo tsa ka nako tseo, ba qobelwa ka potlako ho batlisisa moo ekaba Morena enwa a tswetsweng teng. Ho Mika 5:1, ke moo ba fumanang ditaba tsa hore o tswaletswe Betlehema wa Judea.

Leqitolo Heroda le kgotsofotse. O tla etsa bonnete ba hore Ngwana-Morena a keke a phela. Feela hona ha a o phete phatlalatsa. O fatisisa ho balepi bana hore na ebe ba bone naledi yeo ho tloha neng. Ka hona o ne a rata ho tseba hore ngwana a ka be a se a le dilemo tse kae? O ba romela pele Betlehema ka mantswa a reng, ba kgutlele ho yena hape, ho tla mo tsebisa moo ngwana a tswaletswe teng. Rea tseba hore o ne a sa rate ho ya ho kgumamela ngwana, empa ka sepheo sa ho mo fenetha.

Baena le dikgaitse, le kajeno ho ntse ho na le batho ba jwalo ka Heroda - ka kerekeng. Ba etsa eka ba sebeletsa le ho kgumamela Morena, empa dipelo tsa bona di hole le yena. Ha ba mo rate. Ba bohlokwa haholo mahlong a bona. Ba batla ho ba marena a maphelo a bona. Mme sena se etsa hore Krete a be yeo ba sa tsamaelaneng le yena. Hobane yena o batla ha a ka sebeletswa a le mong feela, le ho phela ka ditao tsa hae. Bahesong, re ke keng ra sebeletsa Morena, ra ba ra itsebeletsa ka borona. Ba bangata ba ditho tsa kereke ha ba eso tsebe ka tshokoloho ya nnete le boineelo bo tletseng ho Morena. Ba phela ka ho itshepela matla a bona, bophelo bo itekanetseng ba bona, maruo esitana le ditsa bona. Ke ka hoo, jwaleka Heroda, e leng batho ba boi maphelong a bona. Ba etsa dintho tsa mefutafuta ho itshireletsa bobona ho ena le hore ba sebeletse le ho tshepa Morena feela. Ho ba jwalo, Keresemose e ka se be mokete...

### **Batho ba sa tsotelleng, ha feela ba keteka matsatsi a tswalo a monate**

Baetapele ba kereke ba ka nako tseo, e leng baprista ba baholo le bangodi, ba ne ba tseba hore Molopolli wa Iseraele o tlamehile ho tswalwa. Sena se kile sa porofetwa ke baporofeta ba kgale, jwalekaha ho ngodilwe Testamenteng ya Kgale, eo bona ba neng ba e tseba hantle. Moo ho ne ho eme le moo a tla tswalwang teng. Leha ho le jwale bangodi, ba ne ba sa fete Heroda ka botho. Haele Heroda, o ne a sa tsebe moo kgosana e tla tswalwang teng, bona ha ba tseba tsohle ka tswalo ya Krete. Mohlomong menyenyetse e ile ya eba teng e tswang dinaheng tsa Efrata mantsiboeng a bosiu boo ka tswalo ya Krete, empa ha ba ka ba itlhopha ka taba ena...

Le jwale haele mona ba ileng ba tsebiswa ke balepi ba dinaledi hore Krete o tswetswe, baetapele bana ba a dula, ba a bata. Re ne re ka lebelela hore batho bana ba tla hlasimoloha ka thabo haele mo Molopolli - ya neng a lebeletse nako e telle a tswetswe. Re ne re lebeletse ha ba tla re ho balepi bana: "Re emeleng, re batla ho ya le lona ho ya bona Morena". Empa tjhee, ba kgotsofetse ka tsebo ya bona ya hore Mesia o tswaletswe hokae.

Baena le dikgaitsemi, batho ba jwalo re ntse re ba thola le kajeno. Ditho tsa Kereke, barutehi, ba tseba tsohle ka Morena, empa haele yena ha ba mo tsebe. Ha ba so kopane le yena bonneteng. Empa ka kgotsofetse. Ho ya ka bona ba tseba Bibeke, ba dula ka kerekeng ka Sontaha, ba ntsha dikabelo tsa bona, ba kolobetsa bana ba bona, mme hape kereke e tla ba pata mohlang ba sweleng. Ho ya ka tshadima ya kantle tsohle di shebahala di le hantle, empa ka hare ho dipelo tsa bona, ho nale phoso e kgolo, batho bana ke bafu ba ntse ba phela. Ho bona Keresemose ke letsatsi le senang moelelo, ha le re letho ho bona. Ha feela batho bana ba ja, ba nwa mme ba thaba, ho lokile. Ba a tseba hore Keresemose ke letsatsi la sehopotso sa tswalo ya Morena, empa hona ha ho ba thabise, ha ba itumelele taba ena.

### **Batho ba lakatsang Keresemose (ka mantswa a mang: ba lakatsang Morena Jesu ka sebele, monga letsatsi leo)**

Modimo o tiisitse ka hloleho (naledi) le ka Lentswe la Hae (Mika 5:1) hore balepi ba dinaledi ba fumane Morena wa baJuda, eo baJuda ba neng ba sa mo tsotelle. Balepi bana ba ile ba dumela, mme ba phehella ka ho batla motho eo ya tla tlisang phomolo dipelong tseo tsa bona tse hlokanang phomolo.

Mme qetellong ba mo thola! Eseng paleising e kgabileng ka botle, empa setaleng! Ha ba mo fumane jwalo ka ngwana morena le mofumahadi, empa e le ngwana wa Josefa le Maria, batho ba neng ba futsanehile, mme hape ba ikokobeditse. Le ha ho le jwalo, ba a kgolwa hore ke yena Morena. Ke ka hoo ba mmontshetshang hlomphe e loketseng Morena. Gauta e ne e le mpho e neng e newa marena. Dibano le mirra le tsona e ne e se dimpho feela, di ne di abelwa marena a kahodimo.

Balepi bana ba ne ba sa tshabe jwaleka Heroda. Ba ne ba sa bate, le ho tsitsila jwaloka baetapele ba kereke (bangodi le diprista). Ba ne ba thabile haholo. Ba ne ba na le kgotso e tebileng dipelong tsa bona - kgotso yeo mangelo a neng a bina ka yona tswalong ya Morena Jesu.

Ha re phetheng potso eo re e boditseng qalong: “Nna ke wela sehlopheng sefe ho tse tharo tsena na?” Kaofela ha rona re batla ho tshwana le balepi bana ba dinaledi. Empa re tla tlameha ho hopola hore ba fumane Jesu jwang!

Tabeng ya pele ba ile ba mamela Lentswe la Modimo (naledi le Lentswe la Hae). Tabeng ya bobedi ba ile ba mo batla.

Ka mamello le ka ho batla - a re ketekeng letsatsi la tswalo ya Morena. Ya batlang ho mamela hantle, o tla utlwa. Ya batlang ka botshepehi, o tla fumana - mpho e kgolo ka ho fetisisa yeo motho a kileng a e fumana!

Ha Keresemose ena e be letsatsi leo o tla boelang o fumana hape Molopolli wa hao. Mme a thabo ya hao e tlale ho wena le selemong se setjha!

Amen!

## **Phutheho, moruti le Modimo**

Bala 1 Bakorinthe 3:1-9



## **Selelekela:**

Baratuwa Moreneng wa rona Jesu Krete, kajeno lena ke rata ho bua le lona ka dikarolo tse tharo tse senang ho fediswa ha bonolo ka Kerekeng: ditho, moruti le Modimo, le kamano ya tsona. Pauluse o nolofatsa taba ena hore re e utlwisise. O hlalosa taba ena ka ditshwantsho. O tshwantsha phutheho le mobu o lengwang, baruti bona ke balemi ba lemanang le ho nosetsa mobu ona. Athe Modimo ke Yena ya hlohonolofatsang tse jadilweng hore di behe ditholwana.

## **Balemi**

Pauluse o re ha a qala ho bua le BaKorinthe, ha ho na ho eba le ditholwana le ho mela, mobung wa phutheho ena. Hobane ho ena le hore ba be baholo tumelong, ba ntse ba le jwaloka masea. Ho ena le hore ba thabele dithero tse ba hahang, Pauluse o ntse a tlamehile ho ba fepa ka dijo tsa bana. Mabaka a bakang taba tsena, ke hoba batho bana ba na le mona, diphaphang, diqabang, mohono. Dintho tse kang tsena, ha se ditholwana tsa Moya. Tsena ditholwana di bewa ke batho ba baetsadibe. Tse ding tsa ditho di re ke balatedi ba Apollo, tse ding ke tsa Pauluse. Karolo e nngwe le e nngwe ya ditho tsena e na le moruti wa yona. Ba beile mehopolo ya bona hodima moruti, Krete yena o kgellwa ka thoko!

Taba e tjena e ntse e etsahala le ka Kerekeng le kajeno, tsohle di matsohong a moruti. Moruti ke yena ya shejwang dinthong tsohle, ebile hape o tlamehile ho sheba hore kgolo e be teng phuthehong. Ho a etsahala hore ha moruti enwa a se a ya phuthehong e nngwe, ebe phutheho yeo a e siyang e ya putlama. Phutheho le yona e etsa tsohle ho kgahlisa moruti. Bongata bo rata hlomphe le thorisano yeo ba e fumanang ho tswa ho moruti. Empa hape o ntse o fumana hore moruti le yena o ntse a rata ho ka fumana thorisano le hlomphe e jwalo ho tswa dithong. Ka mokoeng ona ba hula batho hore ba tle ba be le balatedi.

Pauluse o re hlalose ka kamano ya nnete pakeng tsa moruti le Modimo. Pitso ya moruti ha se ho kgahlisa phutheho, empa o tlamehile a mamele Modimo. Hape baruti ha ba a lokela hore ba ipatlele balatedi, empa ba loketse ho etsa batho balatedi ba Krete. Pauluse o hlakisa taba ena hore hlomphe ha e lokele ho ya ho moruti empa e ye ho Krete ka sebele. Haele moruti o mpa a le mosebeletsi wa Modimo feela. Modimo ke yena ya mo laelang, monga hae.

Hona ha ho bolele hore moruti ha a bohlokwa hohang. Hobane Modimo ha a nee motho tumelo motho a robotse. Leha a ne a ka etsa jwalo, Modimo o ratile hore motho wa Hae a tle tumelong ka ho utlwa Evangedi mme a sokolohe ke hona. Kahoo ke mosebetsi wa baruti ho hasa Evangedi, hore batho ba e utlwe mme ba dumele. Ke seo Pauluse a se buang ha a re yena o hlomile, mme Apolose yena o noseditse. Mosebetsi ena ka bobedi e bohlokwa. Lehlakoreng le leng re ke ke ra hloma diphutheho feela ra di tlohela di le jwalo. Diphutheho tsena di tlamehile ho nosetswa, ho hlokomelwa, le ho hahuwa tumelong. Le teng re se keng ra sheba feela ho baballwa ha diphutheho tsena, ra lebala hore e ntse e le mosebetsi wa Kereke hore Evangedi ena e phatlalatswe le ho ba leng hole le Krete. Ena e hlile ke yona phoso e kgolo e etswang ke dikereke tsa rona. Di shebile feela ho ema ha phutheho. Ha di re letho ka ditulo tseo ho senang diphutheho tsa Kereke ya rona ho tsona. O tla fumana hore baruti ba feta baevangedi ka palo hole dikerekeng tsa rona. Ke mosebetsi wa baruti ho hloma le ho nosetsa - eseng ho hlomola le ho tjhesa ka baka la diphaphang tse teng kahare ho phutheho.

Pauluse o boela a hlakisa taba ena ya hore leha ena le Apolose ba ile ba fapana ka thomo, bobedi ba bona ba ne ba lekana mosebetsing wa phatlalatsa. Kereke ya rona ha e dumele mo maemo, kaofela, baruti, baholo, le bahlanka ba a lekana. Hape re dumela hore bohle ba na le mosebetsi wa bodumedi e leng boprofeta, boprasta le borena.

Kahoo baruti ba bohlokwa empa mahlong a bona le a phutheho ba tlamehile ho phela ka boikokobetso. Hobane: ha ba tsebe ho etsa ho fetisa ho hloma le ho nosetsa. Ho medisa le behisa ditholwana ke mosebetsi wa Modimo.

## **Modimo ya hlohonolofatsang**

Baruti, baholo le bahlanka ba ka sebetsa kamoo ba ratang le ho kgona kateng. Empa ha Moya o Halalelang o sa hlohonolofatse mosebetsi wa bona, tsohle ke lefeela la mafeela. Ke yena a le mong ya medisang peo e jetsweng le ho nosetsa dipelo tsa rona. Moya o etsa hona le moo nna le wena re neng re ke keng ra lebella tshebeletso ena ya Moya teng. Moya o Halalelang ha o ikemele hodima mesebetsi ya rona - empa ke hlomphe e re e fumanang haele mona re sebediswa tshebetsong ya Modimo. Ke kahoo re tlamehile etsa mosebetsi wa rona empa hlomphe e sa tle mothong, empa e ye ho Modimo.

Pauluse o eketsa ka hore Modimo o tla putsa baruti, baholo le bahlanka bohle ba sebetsang ka tshwanelo. Hore moputso ona ke eng ha ho ya tsebang. Ena taba ha e re ame hakaalo, sa rona ke hore re sebetseng.

Na re thaba e le ka nnete ha re bona kamoo Modimo o hlokomelang bana ba Hae kateng le kamoo a ba sokollang kateng?

## **Mobu o lengwang**

Potso e bohlokwa mona ke ho re: “jwalo ka ditho tsa Kereke le amana jwang le baphatlalatsi ba Evangedi?”. Ha re ba etsa medingwana kapa ra etsa hore e mong a bonahale eka o bohlokwa ho feta e mong, re etsa phoso. Seo re hlileng re loketse ho se etsa ke ho mamela ditaba tse molemo tseo ba re tlelang le tsona.

Ho Matheu Krete o re hlakisetsa hore peo ha e wele mobung o motle ka nako tsohle. Peo yeo e ntse e ka nna ya wela mobung o thata o omeletseng, moo e jewang teng ke dinonyana tsa lehodimo. Peo ena e leng Lentswe e ntse e ka wela le mobung o sa tebang, moo e reng ha peo e hlaha ebe e shwa ke motjheso wa letsatsi. Re ka qetella re ipotsitse hore na ebe rona re wela mobung o jwang? A re se keng ra ithetsa banabeso. A re arabeng potso ena ka botshepehi.

E se eka Modimo a ka re thusa ra eba mobu o lokisitsweng, o motle, o behang ditholwana ka nako tsohle. Ho ya ka setshwantsho sena sa Krete batho ba tjena ke ba phelang ho ya ka Evangedi ena. Na o emong wa bona?

Baena le dikgaitsemi, ha re bua ka Kereke, ha re se keng itshepela bohlale ba rona. Re se keng ra kgesa batho ba bang le ka mohla le eseng rona kapa basebetsi ba bang. Kerekeng ya nnete ya bohlokwa ke Modimo, eseng baruti, baholo, bahlanka kapa phutheho. Modimo mohaung wa Hae ke yena ya re ntjhafatsang!

Amen!

# Hlokomelang kamoo le ahang kateng!

Palo ya Lentswe: I Bakorinthe 3:5-21

Baratuwa Moreneng wa rona Jesu Krete, therong ya rona ya pele re buile ka ditho tsa phutheho, baruti ba bona le Modimo. Modimo ke yena ya hlohonolofatsang mesebetsi ya rona ka Moya wa Hae o Halalelang, ha ho se jwalo mesebetsi yohle ya rona e tla be e nyopile. Re ile ra bua ra re, phutheho e jwaloka mobu o sebetswang, o lenngwang le ho nosetswa ke moruti. Ha Modimo yena a hlohonolofatsa mosebetsi o thata ona ka ho o medisa le ho o behisa ditholwana.

Kajeno moapostola Pauluse o sebedisa setshwantsho se seng ho re hlalose tsa ditaba tse batlileng di tshwana le tsa pele. Phutheho e jwaloka moaho, oo moruti jwaleka ka seahi, a loketseng ho thusa ho o aha. Krete yena ke motheo (fondeishine) ya moaho ona. A re tadimeng dintho tse tharo tsena:

## **Kreste ke motheo**

## **Mosebetsi wa ho aha wa baetapele**

## **Sehahi se phethehileng**

## **Kreste ke motheo**

Ha motho a aha ntlo, o qala ka motheo pele, eseng ka leboha. Hobane motheo o tiisa hore ntlo e tla ema. Ha motheo o sa tiya hantle, ntlo e ke ke ya ema e tsitsitse, mabota a tla qala ho phanyeha kapele, mme qetellong ntlo yeo e tla wa. Krete o re bukeng ya Mattheu le Luka, ntlo ha e ahuwe lehlatheng, empa e ahuwa hodima lefika. Kajeno re sebedisa majwe le samente ho tshela motheo.

Pauluse o theile motheo wa Kereke ya Korinthe jwaloka sehahi se hlwahlwa. O theile phutheho ena, eseng ka matla le bokgoni ba hae, empa ele ka mohau wa Modimo. Motheo wa sebele ke Krete Jesu. Pauluse o bolelang ka taba ena? O hlalosa hore o ithutile tsohle ho Krete, mme bohle ba tlamehile ho mo amohele jwaloka Motheo wa maphelo a bona.

Le mo phuthehong tsa rona, ho teng dinatla tse kileng tsa beya motheo o matla. Re ka ba bitsa le ka mabitso a bona. Re se keng ra lebala mosebetsi wa dinatla tsena le ka motsotso o le mong. Empa, ha re se keng ra nyolla mosebetsi wa bona ho fetisa tekanyo. Eseng bona, empa motheo oo ba o beileng, e leng Jesu Krete, ke yena ya bohlokwa ka ho fetisisa. Moruti kapa moholo kapa modulasetulo sinotong, kapa yena mopapa ha se bona motheo, - ke Krete feela eo eleng motheo wa sebele wa nnete wa Kereke. Kantle ho Krete, kereke e ka se be Kereke. Re se keng ra lebala ha Krete, e le Tshiya, lejwe la pele, Ee hlooho - dinthong tsohle tseo re di etsang.

Batho ba bangata kahare ho rona ba nahana hore Krete ke wa bobedi maphelong a bona. Tumelo ya rona ya Afrika ho ba bang, ke yona e tlang pele, mme Krete o latela tumelo ena. Seo tumelo ya rona e pallwang ke ho se phetha, Krete ke yena ya tla phethang hoo. Re kana ra re Krete ke seshebo hodima bohobe! Sena ha se seo Pauluse a re rutang sona. Ho ya ka yena, Krete ke yena wa pele, mme hape ke yena feela Motheo wa nnete wa tumelo ya rona!

### **Mosebetsi wa ho aha wa baetapele**

Tabeng ya pele, Pauluse o kgothaletsa baholo ba rutang (baruti) le baholo ba busang hammoho le bahlanka hore ba be dihahi tse hlwahlwa. Ba haha ditho tsa Kereke ka ho ba bontsha tsela ya Lentswe la Modimo.

Na re a eellwa tsatsi ka leng hore re na le boikarabelo bo boholo hakaakang? Ha re le botswa, mme re senya ka mosebetsi wa rona, phutheho e tla dula feela moo e leng teng. Tumelo ya yona e ke ke ya hola, ba phutheho e tla dula e le lesea. Ha re beya mohlala o mobe, jwaloka ho tahwa, ho utswa, le ho hlola kapa ho feba, re tla be re sa ahi empa re tla be re heletsa. Ke nnete hore motho o wa hola tumelong. Ha motho a se a hotse tumelong, mme a arolelana le ba bang ditaba tse molemo, motho eo le yena o ntse a rua ka ho fetisisa. Ha o arolelana le ba bang ka tsa tumelo ya hao, ha o kgutlelele morao ka tumelo!

Tabeng ya bobedi, Pauluse o re eletsa hore re seke le ka mohla, ra beha motheo o mong, kapa ra beha wa bobedi haufi le o kilweng wa thewa ke Krete. Ka bomadimabe baetapele ba bangata ba dikereke esitana le barupelli thutong ya Modimo ba etsa phoso e jwalo. Ba ruta hore ha ho phoso ha motho a dumela ho badimo, meya, bouPELLI, jwalojwalo. Ha re sa furalle dinto tsena kaofela, re ke ke ra eba phutheho ya nnete ya Modimo! A re ikgetheleng hore re aha hodima motheo wa Krete, kapa metheo e meng e seng e boletswe.

Tabeng ya boraro, Pauluse o re, mosebetsi wa ho aha (mabota, marulelo a moaho) o tshwanetse ho tsamaelana le motheo oo Krete a o theileng. O se ke wa fapana. Leha motho a na le motheo o lokileng, o matla, empa ha a aha ka disebediswa tse fokolang, a ke ke a aha ntlo e tiileng. Pauluse o hlalosa taba ena ka ho fapantsha gauta, silefera kapa majwe a bohlokwa, le mahong, jwang le dihlokwa. Tse tharo tsena tse qetellang, di bola le ho senyeha ka pele, kapa hona ho fefolwa ke moya.

Ka baka lena a re aheng ka tse disebediswa tse bohlokwa feela phuthehong ena ya rona. Empa potso ke hore, gauta, silefera le majwe a bohlokwa ana ke eng? Ke boithuto ba Lentswe la Modimo ka mehla, ditjhakelo tsa matle, thero, tayo hodima phutheho, le ho abiwa ha disakramente; ka tsena re ka aha moaho o ke keng wa wa le ka mohla o le mong. Hona ho kenyeletsa le dikabelo ho ya kamoo Modimo a hlohonolofaditseng motho ka teng. Kantle ho dikabelo tsena re ka se be le, kapa hona ho bitsa moruti.

Baena le dikgaitsemi, tlong re faneng ka tsohle tse ntle tseo re nang le tsona. Modimo o kopa mosebetsi wa maemo a hodimo, o makgethe, ha eba re batla ho aha ntlo ya Hae.

Tabeng ya bone, Pauluse o re eletsa hore mosebetsi wa rona, o tla lekwa kapa ho batlisiswa. Re ka se etse qeto ka borona hore mosebetsi ona o lokile, mme ra o thabela. Teko ya mosebetsi e tla etsahala mohla letsatsi la kahlolo, ha Krete a tla hape ho ahlola maphelo le mesebetsi ya rona. Mollo o tla bontsha hore ke mang ya ileng a aha ka bojwang le moroko kapa ka kgauta

le silefera. Teko e ka phethahala ha dikereke di hloriswa kapa ha Satane a leka Bakreste hore ba etse ho sa lokang. Ke hona ho tla bonahalang hore motheo o tiile hakaakang. Tabeng ya bohloko, Pauluse wa re tshedisa ka ho re tsebisa hore ha re sebeletse lefeela. Empa moputso o teng bakeng sa basebeletse ba nnete le ho baahi. Mohlomong ha re bone ditholwana tsa mosebetsi wa rona maphelong a rona. Empa ka letsatsi le leng, re tla tseba hore dipheto di jwang mme re tla thaba haholo. Ha re kgothaleng mme re se lahleng tshepo.

Baholo, bahlanka le baruti le baevangeli, ka baka la hore ditho di hana ho mamela, le tla kgathala le be le fele pelo ke ho aha. Mohlomong ha re bone ditholwana tsa mosebetsi ya rona bophelong. Hopolang ditshepiso tsena: 'o tla putswa', mme o se tepelle ke hona. Ha re bolellwe hore moputso oo e tla ba eng. Empa e tla ba o moholo, e tla ba semaka se ruileng, ntho eo re ke keng ra e hlalosa.

Mohaung o moholo wa Modimo, le ha mosebetsi ya rona e ka putla/nyopa, rona re tla phonyoha. Jwalokaha eka re fetile mollong, re tla feta jwalo kahlolo eo.

Jwale re ya utlwisisa hobaneng Pauluse a re, re tadimeng kamoo re ahang kateng. Ke mosebetsi o hlokolotsi ho ba mosebeletsi ka Kerekeng. Ho tshabisa motho! Hobane - ebile re karolong ya ho qetella - re aha tempele ya Modimo!

## **Sehahi se phethehileng**

Moaho kapa phutheho ha e emiswe ke ditho feela, empa o kenyeletsa le basebeletsi (baruti, baholo, bahlanka le baevangedi).

Hape moaho ona ha se o tlwaelehileng jwaleka wa borekisetso, kapa ntlong. Tjhee, Pauluse o re, moaho ona ke Tempele. Re ya tseba hore tempele Testamenteng ya Kgale e ne e le moaho wa Modimo.

Testamenteng e ntjha ha re sa bua ka tempele. Moaho ona wa kereke ha se wa tempele e ahuwang ka matsoho. Tjhee, ke rona tempele ya Moya o Halalelang!

Tempele ke ntho e halalelang. Hona ho bolelang? Ho bolela hore nna jwaloka tempele ya Modimo, ke phela ho ya ka melao ya Hae. Ha ke sa mamele melao ya Hae, ke tshwana le ntlo e ditshila, e mamphemphe, e mpe, e tshabehang, oo Moya wa Modimo o ke keng wa phela kahare ho yona.

Ba hao bophelo bo jwang ngwaneso? Na o bula monyako wa tempele ya hao hore o memele Morena hore a tle ho aha kahare ho yona? Kapa o swabela ho etsa hona na? Hopola hore ke boteng ba Moya o Halalelang bo o tlisetsang dineo tsohle tsa Moya o Halalelang. Ke mang ya sa rateng dineo tsena tse ntle na?

A re se keng ra itshepisa bohloko ba lefatshe lena, ha bonneteng re batla ho haha Kereke ya Modimo. Bohloko bona ke bothoto feela. Re tlamehile ho mamela Modimo. Lentswe la Hae ke motheo wa kaho ya rona.

Hodima moo, a re se keng ra itshepela moaho kapa batho, le eseng baruti (Pauluse, Apollo, Kefase, le bao re ba tsebang). Ha se bona ba bohloko. Kaofela ha rona, re mpa re le balemi

le baahi, basebetsi-mmoho, basebeletsi ba Modimo.

Qetellong, Pauluse o re hopotsa ntho e bohlokwa ka ho fetisisa. O re, “jwale, le nakong e tlang, bophelong le ho sweng, re ba Krete le ba Modimo”. Jwalokaha re ipolela “Thutong ya Poloko” (Katekismeng) ha re re: “Tshediso e le nngwe ya rona bophelong le lefung ke hoba ha re ba rona, empa re ba Hae, yena Mopholosi wa rona Jesu Krete.”

Le phutheho ena ya rona, e fokolang, e nyenyane, ya Boskop, ke ya Modimo o matla ohle. Ha ho letho, leha e le eng, e ka re ntshang matsohong a Hae, leha e ka ba lefu. Re na le tumelo e ka etsang hore re phele ka thabo - ha ho kgonahala - re sweng ka nyakallo le thabo!

Amen!

## **Na le mamela baprofeta ba bohata kapa ba nnete?**

Bala: Jeremia 23: 9-32

Ditemana-thero: Jeremia 23: 28b-32

Bakreste ba ratehang, kajeno ho nale banna le basadi ba bangata ba reng ke baprofeta. Ba bang o tla fumana ba apere seaparo se kgethehileng, mme ba itlama matheka ka dinyepa tsa mefutafuta. Batho ba mamela baprofeta ba mofuta ona haholo, haholoholo ha ba kula. Bibe e re ruta ke hona hore re be le kelohlolo. Batho bana ba na le ho ba jwaloka diphiri kahara matlalo a dinku! E ka nna ya eba baprofeta ba bohata ba re kgannelang tseleng e sa lokang. Kajeno re tlo utlwa seo Lentswe la Modimo le re layang sona: hore na moprofeta wa nnete o jwang le hore moprofeta wa bohata o jwang - hore re tle re tsebe ho mamela moprofeta ofe. Pele re kena tabeng ena, tla re shebisiseng seo baprofeta ba kajeno ba di etsang.

Ho etsahala hore ditho di bolele tseo ba di lorileng bosiueng ba ho feta, ebe moprofeta o rarolla ditoro tsena. Ba kgolwa hore metsi a kolobetso a na le matla, haholoholo a ellang jwaleka metsi a sediba. Ha ba kopantsha metsi ano le siwasho mokudi o wa fola. Ditho tse ding di sebedisa metsi a mofuta ona ho tebela boloi le mafu.

Ba porofeta dintho tse tla hlahang, mme ba o bolela hore o qobe diqaka tsena jwang. Ba kgona le ho o bolela hore o kudiswa keng, kapa ke mang ya o loileng. Ba o porofetela hobaneng lenyalo la hao le sa tsamaye hantle. O ka makala e le 'bakreste' empa ba o bolela hore badimo ba hao ha ba a thaba. Bahesong, di ngata dintho tseo re ka di qolang.

Empa ha re shebisisa buka ena hantle, e re sa tswa e bala, re elellwa hore baprofeta bana ba tshwana hantle le bao Jeremia a buang ka bona, baprofeta ba Samaria. E ne e se baprofeta ba Modimo. Ba ne ba bua ditaba tsa bohata e seng nnete. E ne e le baprofeta ba Baale. Ba ne ba kgelosa batho ka ho kopantsha dintho tsa Modimo le tsa mashano. Ba ne ba sa tlise Lentswe le hlwekileng la Modimo setjhabeng.

Bongata ba baprofeta bao re ba tsebang kajeno, ba jwalo. Ha ba phatlalatse feela Evangeli (molaetsa wa Modimo), tjhee ba kopantsha evangedi ena le molaetsa o hlahang badimong (medimong). Kahoo, ho ba thata ho modumedi ho etsa phapang mahareng a ditaba tsa bokgelohi le tsa nnete. Bana baprofeta, ke ba tswakang boprofeta bona le bongaka. Ke kahoo ba rutang batho hore Bibe ha e lwantshane le badimo. Athe ba bang ho shebahala eka ba rapela Modimo ka botshepehi, empa ba ntse ba dumela mahlabelong le ditjhesong, athe Krete o thakgiseditsweng na? Mahlabeledo le ditjheso tsa bona ke tsa eng? Na ha ba lwantshane le Modimo ka merapelo ena ya bona e fosahetseng?

Bahesong, baprofeta bana ba kotsi. Kerekeng ya rona ya Gereformeerde ha re dumele ho bona. Modimo o hlakisa taba ena Lentsweng la Hae hore re mameleng yena feela, mme re itshepeleng Lentswe la Hae feela.

A re boneng hore Jeremia ena o fapantsha baprofeta bana jwang. Ho thata ho etsa phapang mahareng a baprofeta ba bohata le ba nnete. Re na le dintlha tse supileng tseo re ka di qolang.



Taba ya bohlokwa ke hore baprofeta ba bohata ba re ba ronngwe ke Modimo, ba na le mosebetsi o bohlokwa, ke Yena ya ba entseng baprofeta. Jeremia o re temaneng ya 21 le 26, ditaba tsena ha se nnete. Batho bana ba ikentse baprofeta bo bona!

Kerekeng ha re iketsetse diqeto tsa ho ba baprofeta ba Modimo. Ha Modimo a o bitsa, o tlamehile ho rupellwa Lentswe la Modimo dilemo tse ngatanyana, mme ebe hona o hlomamisetswang mosebetsi wa boruti. Ka mokgwa o jwalo o ba moprofeta wa Modimo. Ha se mang le mang ya ka sebetsang jwaloka moprofeta wa Modimo. Ke kahoo Jeremia a reng temaneng ya 18: 'ke mang ya ileng morerong wa Jehova, mme a bona, a utlwa lentswe la Hae? Ke mang ya ileng a ela lentswe la Hae hloko, mme a le utlwa?'

Taba ya bobedi (ntho e etsang hore re kgolwe hore batho ba ha ba a rongwa ke Modimo ke hore) batho bana ha ba tshepahale mme ha ba tobe ditaba hantle, mme ha ba hase Lentswe la Modimo. Ke hangata moo Jeremia a reng batho bana ba leshano. Jwale keng batho ba dumela mashano a bona? Hobane ba bua ditaba tseo batho ba ratang ho di utlwa! Ba tlisa molaetsa o monate. Ho ya ka Jeremia ditaba tsena ha di na molemo wa letho, ke mooko le koro feela.

Moprofeta wa nnete wa Modimo ha a fetole ditaba tsa Modimo. O di tlisa di le jwalokaha a di fumane ho Modimo. Ha se ka nako tsohle ditaba tse hlahang ho Modimo di leng monate. Di na le ho ba bohloko! Jeremia o re Lentswe lena le jwalo ka mollo o tjhesang bobele bohle bo ka ho rona, jwaloka noto e robang dipelo tse thata tsa rona. Ke nnete hore baprofeta ba nnete ba kgothatsa batho ba bone, empa e le ka Lentswe la Modimo. Ha ho hlokahala, ba bolela ditho tsa bona hore ba hatile mehlaleng e mebe, mme ba ba eletsa hore ba lokise ditaba. Baprofeta ba nnete ha ba tshabe ho senyehelwa ke mabitso a bona, hore ba se ke ba tsebahala lefatsheng!

Tabeng ya boraro, baprofeta ba bohata ba etsa hore batho ba lebelle ditshepiso tse sa phethahaleng. Jeremia o re baprofeta ba Samaria le Jerusalema ba ne ba etse jwalo. Ba bolela batho hore ba seke ba kgathatseha, tsohle di lokile, athe ditho di mpe. Ba thetsa batho hore ha ho hlokahale hore ba sokolohe (temana 14). Esitana le ba tlotlollang lebitso la Modimo, ba bolelwa hore ba tla ba le kgotso. Hape le hore ba dihlooho di thata, Modimo o ke ke wa ba otlwa (temana 17)!

Baprofeta ba nnete ha ba etse jwalo. Ha ba lahle ditho. Ke kahoo ba tla kgalemelang ditho ha di fosa. Ba ke ke ba bua ka kgotso, ha Modimo a bua ka ho hlaka hore o tla otlwa setjhaba sena. Jeremia o ne a le jwalo. Empa hona ho ne ho sa mo thuse. Hang kamora diketsahalo tsena, setjhaba se ile sa ya kgolehong. Seo Jeremia a neng a se bua se ile sa phethahala! Boprofeta ba nnete ha bo tsietsi batho, bo a toba. Hape moprofeta wa nnete o etsa hore kamano ya batho le Kreste e dule e mmatlafetse.

Ho re tlisa tabeng e latelang ya hore boprofeta ba baprofeta ba bohata ha bo phethahale. Hobane ba a lotha, mme ha se ka nako tsohle dilotho tsa bona di sebetsang. Se hlahang ho Modimo ke nnete ka nako tsohle. Tsebang phutheho e ratehang, mosebetsi wa moprofeta ha se ho porofeta se tla etsahalng hosane, empa ke ho tlisa hlakisetso ya Lentswe la Modimo bophelong ba rona hona mona le jwale. Baprofeta ba re teanang le bona jwale, ha ba tlise ditaba tsa Modimo. Ba dulella batho ke ditaba tseo ba ratang ho di utlwa.

Taba ya bohloano, baprofeta ba bohata ba ipiletsa hodima ditoro le dipono. Jeremia o re dintho tsena ke tseo batho bana ba inahanetseng tsona. Ha ho motho ya hanyetsanang le bona ka ditoro le dipono tsena. Hodima moo bone batho bana ba tla batla le hlakisetso ya ditoro tseo e leng tsa bona, le hore badimo ba ba tshwaretse ditaba tsefe.

Ke nnete Modimo o ka nna wa sebedisa ditoro ho bua le rona. Empa re tlamehile ho leka bonnete ba ditoro tsena leseding la Lentswe le phelang ka Modimo. Haeba o lora toro e kgahlanong le ditaba tsa Modimo, ho hlakile hore toro yeo ha e hlahe ho Modimo, o fumana hore e mpa e le mehopollo e mebe feela e mathang kahare ho rona. Moprofeta wa nnete ha a na ho botsa hore o lorileng maobane, tjhee, ena o tla re, “utlwa seo Modimo a re tshwaretseng sona kajeno”.

Hape le maphelo a baprofeta bano, a ntse a ka re ruta hore na ebe batho bana ba ronngwe ke Modimo kapa tjhee. Jeremia o re baprofeta ba dinako tsa hae, ba leshano, ba a thetsa, ba a feba mme ba thusa batho ba etsang bobele, hore ho se be le motho ya sokolohang. Ka baka la bobele ba baprofeta bana, ho hloka Modimo ho ile ha phatlalla le lefatshe! Kahoo re ka re baprofeta ba bohata ba na le mantswa a matle, empa mantswa a bona ha a tsamaelane le mesebetsi ya bona. Athe moprofeta wa nnete ha a rere feela Lentswe la Modimo. O phela ho ya ka lona. Ha a sitelwe Modimo le phutheho, hore a tle a ratwe. Tjhee, o ba rohaka ka Lentswe la Modimo.

Tabeng ya ho qetela, ke hore baprofeta ba bohata, ba sebedisa matla a bona ka mokgwa o fosahetseng. Ba nale tshwaetso e kgolo bathong. Ha e mong wa bona a o “fodisitse”, o tla re ho wena, **moruti wa hao o paletswe ke ho o fodisa, kahoo tlohela kereke yeo e sa tsebeng ho fodisa batho**. Ka tsela ena ba fumana balatedi ba bangata. Re se re bone hore ke nnete, baprofeta bana ha ba thusa e le ka nnete. Ba tsietsa le ho kgelosa batho feela.

Baprofeta ba nnete ba tseba tsela ya bophelo. E seng ya bona tsela, empa tsela yeo Modimo a re bontshang yona. Jesu Krete ke yena tsela ya nnete e lebisang bophelong bo sa feleng! Ha re kgetheng hore re batla ho mamela mang. Modimo o hlaloesetsa Jeremia hore o tla otlwa batho bana jwang; **“Tsela ya bona e tla ba jwaloka nqalo e boreledi e lefifi; ba tla kgothometswa, ba wele teng, hobane ke tla ba hlahisetsa tsietse mohla ke ba kgalemelang; ho bolela Jehova (temana 12)”**.

Pele le ka utlwa monate, ka ho nahana hore batho bana ba tla otlwa ba le bang feela. Le se keng la lebala hore batho ba mamelang baprofeta bana ba bohata, le bona ba ntse ba le molato. Le bona Jeremia o re hlaloesetsa kotlo ya bona; bohale ba Jehova bo ke ke ba kgutsa, kgalefo e tjhesang ya Jehova e tla ba wela hodima. Qetellong ya kgaolo ena Modimo o re o tla ba lebala ruri, o tla ba ngala a lahlele sefahleho sa Hae hole le bona. Hape Modimo o re o tla bea hodima bona sekgobo se sa feleng le nyediso e sa feleng, e se nang ho lebalwa.

Baena le dikgaitsemi, le kgalemetswe ka nnete. Le se keng la adima ditsebe tsa lona ditaba tse hlahang baprofeteng ba bohata, mme la kgolwa seo ba le bolelang sona. Mamela baprofeta ba Modimo, ba le bontshang tsela ya bophelo.

Amen!

# Sebe ke tlolo ho Modimo le batho

Bala:2 Samuele 11:1-27.

Ditemana-thero: 2 Samuele 11: 26-27

Baena le dikgaitsemi, kaofela ha rona re baetsadibe. Esitana le batho bao re ba tadimang jwaloka bahalaledi le bona ba ntse ba etsa ditlolo tsa molao. Dafida e ne e le motho ya ratehang pela Modimo. O ne a etsa dipesalema tse ntle tse neng di paka botebo ba tumelo ya hae. Leha ho le jwalo, o ile a etsa sebe se seholo, jwalokaha re badile bukeng ena. Di ngata he, dintho tseo re ka ithutang tsona, temaneng tsena tse re kgalemelang, le tse re bontshang hore ha re sitetswe Modimo re etse jwang.

Ha re tadimeng taba tse tharo tsena:

## **Sebe sa Dafida**

### **Ditlamorao tsa sebe sa hae**

### **Tshwarelo ya ditshito tsa hae**

## **Sebe sa Dafida**

Ho ena le hore Dafida a etse mosebetsi wa hae wa borena, o dula lapeng. Satane o sebedisa monyetla ona ho mo isa molekong. Dafida o bona mosadi ya motle, ya motjha, a ntse a hlapa! Hobane ele morena, o na le matla ao a ho mo bitsa hore a tle ho yena, ho tla robala. Ka sebe sena o tlola melao e mmedi ya Modimo: molao wa lesome o reng: “O seke wa lakatsa mosadi wa wa heno” le molao wa bosupa o reng: “O seke wa feba”.

Ha ho se ho le pepeneneng hore Bathe-Sheba o mmeleng, Dafida a kena kgathatsong e kgolo. Hobane monna wa Bathe-Sheba, Uria, le batho bohle ba motse ba tlo tseba ka bohlola bona ba Dafida. Taba ena e ka se hlole e eba sephiri! Ho ena le hore Dafida a ye ho Uria, a lo ikopela tshwarelo le ho Modimo, o qala ho tlelwa ke mehopollo ya Satane. Jwale o tlola molao wa borobong o reng: “O seke wa etselletsa wa heno ka leshano”. O bitsa Uria ho tla Jerusalema ho tla robala le Bathe-Sheba, mosadi wa hae, hore e re ha ngwana a hlaha, ho tle ho thwe ke wa Uria, ntatae.

Ha morero ona o nyopa, Dafida o itlama le ho fetisisa sefing sa e mobe. Ho setseng ke hore ho fele ka Uria, jwale o tlola molao wa botshelela! O etsa hona ka sephiri, ho tseba yena le Joabe feela ka taba ena.

Heela, na ha re jwalo le rona na?

Re nahana hore sebe seo re se etsang sephiring, ha se sebe se seholo hakaalo. E eba sebe feela ha se se tsejwa ke batho. Modimo o bona dipatilweng tsohle, esitana le tseo re di etsang sephiring, o di hlahisa leseding. Mmina-thoko o re: “O di beha pepeneneng, o di hlahisa

leseding”.

Hape re nahana sebe ke sebe ha re se etseditse motho e mong. Karolong e re sa tswa e bala, re ithuta hore sebe ke bora ho Modimo. Re etsa hoo Yena a hanang re ho etsa. Mohlodi thero wa rona o re, “Empa taba ena, e entsweng ke Dafida, ya eba mpe mahlong a Jehova”. Ke kahoo Dafida a neng a ipolela Pesalemeng ya 51 temana 6: “Ke sitetswe wena, wena o inootshi”.

Ho etsahala maphelong a rona, hore sebe se lebise sebeng se seng. Jwalokaha re bone, ka baka la tlolo e le nngwe, Dafida o tlotse melao e le mene! Le kajeno taba tsena di ntse di etsahala. Leshodu le tlola molao wa borobedi, ha a bonwa, le tlola wa botshelela, le ya bolaya hore le se tshwarwe. Mosadi o etsa bohloka le monna e mong, ha monna wa hae a lemoha taba ena, yena le letjhaufa lena, ba a mmolaya. Re ka qolla jwalo mehlala. Ha e mobe a re qhekanyeditse ho fosetsa Modimo ka ho tlola molao, o re tebisa ho tlola le e meng, re be re kene tebetebeng. Ho tshwana le ntshintshi ha e wetse tepung ya sekgo, ha e ntse e tlola jwalo ho itokolla, ke hona e tshwarehang le ka ho fetisisa!

Hape ho na le batho ba hopolang hore motho ya bohlokwa o etsa feela kamoo a ratang ka motho ya maemo a fatshe. Ho ya ka bona hase tlolo e kgolo hakaalo. Ha se seo molao wa Modimo o re rutang sona. Ke ntho e fosahetseng haholo feela. Re ka mpa ra thusa batho bana ba maemo a fatshe, hobane seo re ba etsetsang sona, re etsetsa Krete.

### **Ditlamorao tsa sebe sa Dafida**

Satane o tshwasa Dafida jwalokaha ho tshwarwa tlhapi. Haele mo Dafida a tshwere, ditlamorao di ya mo imela. Bathe-Sheba ha a tsebe hore o tla reng ho monna wa hae. O utlwile bohloko haholo. Dafida lehlakoreng le leng le yena o ntse a ipotsa hore na eba batho ba tlo reng ka morena yo wa bona ya bileng mohlala o motle setjhabeng sa hae. Joabe o wa qobellwa ho ba motlatsi polaong. Uria ya senang molato o itshaenela kotlo ya lefu ha a hana ho bapala le Dafida ka ho pupetsa bobbe. Ka baka lena ho swa le ngwana ya senang molato (Ke tla otlala bana ka baka la bokgopo jwa batswadi ba bona). Oho, bahesong, ha re iso bue ka pelo-bohloko e bileng teng ho Morena e moholo, Ramasedi. Yena ya neng a rata Dafida ka pelo yohle.

Sebe se baka kutlo-bohloko le mahlomola bophelong. Eseng feela bathong ba sitelwang Modimo, tjhee, le bona ba senang molato le ba ba potapotileng. Sebe sa Dafida ha se a ka sa hlakoleha ka lefu la mora Bathe-Sheba. Kantle ho ditlamorao tse tlwaelehileng tsa sebe, Modimo ha a latole molato wa moetsadibe! Leha Dafida a ile a rapela ka matla, a ba a itima dijo, ngwana hae o ile a shwa. Modimo o wa tshwarela, empa ha a tlose ditlamorao tsa sebe!

Re bala ha sebe e le sebe mahlong a Modimo hoo a se otlang ka lefu. Ha Adama le Eva ba ne ba sa hloke kutlo, ekabe lefu le le siyo lefatsheng. Modumedi ha a na ho etsa sebe habonolo. Ha a na ho nka molao wa Modimo e le motlae. Tjhee, re tlamehile ho rapela ka matla, hore re se tlole molao wa Modimo.

### **Tshwarelo ya sebe sa Dafida**

Ho nale ditsela tse tharo ho fumana tshwarelo ya ditshito.

Sebe sea pepeswa. Dafida o lekile ka matla ho pata bohlaswa bona ba hae. Ha a batle ho swabela sebe sa hae. Hoba Natane a fihle ho yena, Dafida o leka ho iketsa ya hlwekileng, mme moprofeta o wa mo toba o re ho yena: **“Monna yeo ke wena!”** Kgaolo 12:7.

Taba ya bobedi ke ho ipolela melato. Ho ne ho sena taba e nngwe yeo Dafida a neng a ka e etsa haese ho ipolela melato: **“Ke sitetswe Jehova”** Kgaolo 12:13. Ho tla ba jwalo le ho rona ha re sitelwa Morena. Leha ho ka nka nako, ho pepeswa, ho senolwa, le ho hlaha leseding ha dibe tsa rona, ho tla ke ho phethahale. **“Monna le mosadi yeo, ke nna le wena!”**. Ka hora ya nnete re se keng ra tla ka maqiti. A tla re ja! Re tlamehile ho ipolela jwaloka Dafida hore re molato.

Ha ho a lekana ha ke ipolela dibe feela pela Modimo ka thapelo, tjhee, le ho ngwaneso yeo ke mo sitetsweng ho ntoketse hore ke ye, ke lo kopa tshwarelo. Haebane motho yeo ha a sa phela, mme a bolailwe ke nna, ke tshwanelo hore ke ye ho ba leloko la hae, ke ye ho kopa tshwarelo. Tshwarelo ena, ke ntho eo re ka e kopang. Leha re sa tsebe hore na ebe, re tla tshwarelwa kapa jwang, ha re e batleng tshwarelo ena. Hobaneng? Kahoba molato ke ntho e boima e re e jarang mahetleng a rona. O ka sitisa motho esitana le ho hema. Matswalo a rona a a re tshwenya, ha re robale hara masiu. Empa ha re ipolela dibe tsa rona, re ikutlwa morolo. Le re Lentswe la Modimo; **“Modimo o wa tshepeha o lokile hore o re tshwarele dibe mme o re hlatswe bokgopo bohle”**. Ngwaneso ha Modimo a o tshwaretse le ngwaneno yo o mo sitetsweng a tla be o lopolotswe kannete!

Baena le dikgaitsemi, na re etsa hona mehla ena ha re entse phoso? Na jwaleka monna o tshwarela mosadi? Wena le moahisane wa hao le phela jwang? Ebaneng re sa etseng jwalo, re ijarela morwalo o boima o etsang hore re se natefelwe ke maphelo a rona.

Ho na le batho ba reng: **“Re tla tshwarela empa re ke ke ra o leballa”**. Batho ba jwalo ha ba na nnete. Hobane motho wa nnete ke ya tshwarelang ebile hape ya leballang. Ha motho a sa leballe e mong, ho tjho ho re ha a so o tshwarele. Modimo o re tshwarela le ho re leballa ditshito tsohle tsa rona.

Ke nnete, ho thata ho ipolela melato, hopola Dafida. Ho thata le ho tshwarela. Ke kahoo re ke keng ra etsa hona ka matla a rona. Re na le Mopholosi wa nnete Jesu Krete. Ka thusa ya hae, re ka etsa tsohle. Ke feela ka matla a Moya wa Hae re ka fihlellang tsohle.

Ha re rapeleng mmoho ke hona hore Moya wa Hae o tle o hlole ka dipelong tsa rona, hore re tle re tsebe ho ipolela melato le ho tshwarela. Kahoo re ke re be batho ba batjha, ba lopollotsweng Moreneng!

Amen!

**Kreste o boetse o re bulela menyako ya**

## paradeisi (lehodimo)

Bala Levitiko 16:23-34 le Baheberu 7: 11-28

Baena le dikgaitsemi, kaofela re hlolohelwa ho kgutlela paradeising (Genese 1). Paradeising moo Adama le Eva ba neng ba phela hammoho hamonate le Modimo pele ba ka hloka mamello. Haholoholo ha dintho di sa tsepame, jwalokaha re hloka mosebetsi, re kula, re tletse bomadimabe, re le bang, re hlolohelwa paradeisi ka tjheseho e kgolo. Botebong ba dipelo tsa rona rea tseba hore lefatshe lena la mahloko, la mahlomola, la tshollo ya madi, la ho hloka botshepehi, ha le kamoo le loketseng ho ba kateng. Ka sebe sa Adama le Eva tse ntle tse molemo, di ile tsa fetoha, tsa eba tse mpe.

Potso ke hore, “Re tla fumana jwang hape kgotso le thabo?” Ka mantswe a mang; “Re tla boela re fumana jwang hape paradeisi?”

Kahare ho rona rea tseba hore bophelo bona ba rona bo seng monate, bo jwalo ka baka la ho se utlwe Modimo ha rona. (Re suthisetsa molato ho Modimo hore ha o tsotelle bana ba hae.) Ka kahoo re leka ka tsela tse ngata ho lokisa ditaba tsa rona ka babuelli ba mefutafuta. Re lebeletse hore batho bana ba eme pakeng tsa rona le Modimo ho re lokisetsa ditaba. Lebaka e le hore re batla ho boelana le Modimo. Batho bana ba tlamehile ho lefswa ka tsela e itseng ho re lokisetsa.

Potso e kgolo ke hore *ke bomang* bao re ba kgethang jwaleka babuelli ba rona. Babuelli ba fosahetseng ba ka re bulela tsela e yang *diheleng* ho ena le hore ba re bulele e yang *paradeising*. Kahoo ha re tadimisaneng dintlha tse tharo tsena:

### **Babuelli ba fosahetseng**

### **Mmuelli ya sa phethahalang**

### **Mmuello ya phethahetseng**

### **Babuelli ba fosahetseng**

Ho na le babuelli ba bangata ba fosahetseng, ba se nang bokgone ba ho ka re kopanya le Modimo e le ka nnete.

Kereke ya Roma e Katolika ba dumella ho Maria ( Mma Jesu) jwaloka mmuelli. Re tshwanetse ho mo rapella, hore a tle a re buelle ho Mora wa hae (Kreste) . Hape ba dumela ho bahalaledi ba bang ba ka re thusang. Re qhelela molao ona thoko, hobane ha o wa itshetleha hodima Lentswe la Modimo. Hape re qhelela thoko le thuto ya Kereke e Katolika ya Roma hore Kreste o re thakgisetswa mmisenge nngwe lw nngwe.

Hara Ma-Afrika re fumana thuto ya badimo. Badimo bana ba haufi le Modimo mme hape ke bona ba ka re buellang pela Modimo. Pakeng tsa rona le badimo ho ntse ho na le dikereke tse

nang le baprofeta ba mefutafuta ba nang le kamano le badimo ho fetisa rona. Ho ya ka puo ya batho bana re na le kamano e ntle le badimo.

Mokgwa oo rona re fumanang kamano e ntle le badimo ke ka mahlabelo. Ha madi a dinku, dipodi le dikgoho a ka tsholoha, badimo ba a thaba mme kahoo ba a re thusa.

### **Mmuelli ya sa phethahaleng**

Ka letsatsi la lesome la kgwedi ya bosupa e ne e le letsatsi le leholo setjhabeng sa Iseraele. Bukeng ya Levitiko re bala lebaka la hore hobaneng letsatsi lena le neng le le bohlokwa.

Ka tsatsi lena setjhaba kaofela se ne se tshwanetse ho inyatsetse dibe tsa bona, mme se bake. Ka tsatsi lena ba ne ba sa lokela ho sebetsa kapa hona ho ja. (Ya neng a tlola molao ona o ne a otlwa ka lefu). E ne e le lona feela letsatsi le qobeletsweng ho itima dijo ka lona.

Moprsta e moholo, Arone, ya hlomamisitsweng ke Modimo, o ne a ema jwaloka mmuelli ka tsatsi leo. O ne a etsa hona bakeng sa setjhaba le bakeng sa hae, pakeng tsa bona le Modimo. Pele o ne a tshwanetse ho hlapa, le ho apara diaparo tse tlwaelehileng tsa boprsta. O ne a sa apare ka letsatsi lena seaparo sa hae sa boprsta bo boholo, ho bontsha boinyatso ba hae pela Modimo.

Jwalo o ne a itlisetsa sehlabelo bakeng sa dibe tsa hae, hobane o ne a ke ke a buella ba bang ha yena ka boyena a na le dibe. Ka madi matsohong a hae, ke hona a neng a ka hlaha sehalaledisong. Hamorao o ne a hlaba phooko ya sebe bakeng sa setjhaba. Hape ka baka la hore o ne a tshwere madi matsohong a hae, ke yena feela ya neng a ka suthisetsa lesira la tempele thoko ho ka kena kganyeng ya Modimo.

Sehalalediso sena sa tabernakele, e ne e le letshwao la paradeisi. Hobane mona Modimo o ne a senola boteng ba hae bathong sebakeng sena. Mekgabiso e neng e le lesireng, e leng dipalesa le bontle, di re tsoetsa mohopolo wa bophelo bo neng bo le ka paradeising.

Ka baka la sebe paradeisi ena e ne e notletswe. Ke feela Arone ya neng a ka kena paradeising ena. Le teng o ne a kena teng hang ka selemo. Mme ha a se a tswile moo masira a tempele a ne a kwala hape paradeisi ena...

Boprsta ba Arone, ha se hore bo ne bo fosahetse, empa bo ne bo sa phethahala. E ne e le moetsadibe, o ne a hlaba diphoofolo tsa mahlabelo, selemong se seng le se seng. Mme ka nako eo a shwang ka yona, moprista e moholo ya neng a mo latela o ne a loketse ho boeletsa ditjheso tsena le mahlabelo selemo se seng le se seng, ho sena lentswe le reng ho lekane.

Ho hlakile hore boprsta ba Arone bo sa phethahalang bo ne bo bitsa boprsta bo phethahetseng. Bible e re ruta hore hona e ne e le seriti sa Krete. Ka nako tse ding re bona moriti o hlangang re sa bone monga moriti. Kahoo Arone e ne e le seriti sa ho tla ha Krete.

### **Mmuelli ya phethahetseng**

Lengolo ho BaHeberu le karolo e re e badileng e re bolela hore Krete ke Mmuelli kapa Moprista e Moholo ya re kgutlisetsang ho Modimo. Empa hobaneng e le yena Mmuelli ya phethahetseng pakeng tsa rona le Modimo?

- ❖ O ne a sena sebe. Ha ho hlokahale hore a iketsetse sehlabelo pele a ka etsetsa rona.
- ❖ Ha a etse sehlabelo ka diphoofolo. O ikentse Sehlabelo! Kahona, e ne e le Moprista hape le sehlabelo ka boyena. A fana ka mmele wa hae le madi a hae ka baka la sebe.
- ❖ Krete ha se motho feela, ke Mora Modimo. Ke Modimo ka sebele.
- ❖ Sehlabelo sa hae se phethahetse hang feela mane Golgotha. Ho lekane.

Ha re sa hloka letsatsi le leholo la Poelano. Letsatsi le leholo la rona la poelano e ne e le ka Paseka ha Krete ha a ne a shwa, ka tsatsi leo lesira la Tempele le ile la taboha ka lehare, mme hoo ha ho a etsahala jwalokaha ho ne ho etsahala ka tsatsi la poelano la Baiseraele. Re itse, ka tsatsi leo lesira le ne le buleha mme le kwaleha hape. Ka Paseka le ne le kgaohe ka lehare!

Ho bolela hore karohano e neng e le teng pakeng tsa motho le Modimo jwale e fetile. Ka baka la lefu la Krete, mosebetsi wa hae wa poelano, re boetse re na le kamano le Modimo, (mme hona ho tshwana le nako ya paradeisi mehlang ya Adama le Eva). Moya o Halalelang, o re ruta seo Ntate a re bolelang sona, le hore re rapele jwang.

Menyako ya paradeisi e boetswe e butswa hape! Ha re sa hloka babuelli ba batho (baprofeta le baprista), leha e ka ba bahalaledi, badimo kapa mahlabelo a itseng.

Baena le dikgaitsemi, paradeisi e bulehileng ka baka la Krete, ha e eso bulehe ruri. Kamora ho kgutla ha Krete lefatshe le letsha le tla tla ka botlalo.

Bala Tshenolo 21 le 22. Re hopotswa mona ka paradeisi e ho balwang ka yona ho Genese 1. Lebaka ho ya ka Tshenolo ke hoba: Modimo o tla dula le rona lefatsheng. Ke Modimo wa rona mme rona re setjhaba sa Hae. Ke kahoo ho ke keng ha hlola ho eba le dikeledi, bohloko, ho hlomoha-pelo, le lefu.

Na le wena o rata ho kena paradeising ena e ntjha? Tlohela ho ikgathatsa ka ho batla babuelli ba bohata bao e seng ba nnete. Amohela Jesu Krete jwaloka Molopolli wa hao a le mong ya phethahetseng. Bontsha hona ka bophelo ba hao ba letsatsi ka leng.

Amen!



## **A re tshaba lefu kapa re hlompha bafu?**

1BaKorinthe 15: 16-19; 35-58

Mohlodithero: 51- 58.

Baena le dikgaitsemi, lepato ho rona batho le bohlokwa haholo, ka nako tse ding o fumana hore lefu le se le eba bohlokwa ho fetisa tekanyo. Mehlang ya kgale ho ne ho hlajwa kgomo, mme nama ya teng e ne e jewa ka ting kapa setampo. Lebaka la ho hlaba kgomo e ne e le ho apesa mofu ka letlalo.

Kajeno ho se ho hlajwa dikgomo, dinku, mme ho phewa hape le dijo tsa mefutafuta. Ha ho makatse ha o thola mafung a mang ho jewa le mafatshe-thothomela. Ho feta moo, makase a rekwang, theko ya ona e phahame, mme o fumana dibakeng tse ding ho batlwa le dipalangwa tse tla palamisang batho ho ya mabitleng. Leloko la mofu le ikenya melatong e meholo kantle ho lebaka. O tlo fumana ka nako tse ding bana kamora lefu ba hloka le dijo ka lapeng. Ba bang ba tsamaya ba tsotse ka baka la mafu. Ho bile ho na le batho ba rekgang seaparo se setjha bakeng sa lepato, hore batho ba tle ba ba bone. Qetellong kamora nako e itseng ho eba le ditlhobodiso, mme ho boelwe ho hlajwe nku, kapa dinku hape. A tshenyo e kaakang!

Re qetella re tlelwa ke mohopolo wa hore mapato matsatsing a kajeno, e se e le ditlhodisano (competition). E mong o leka hore lepato la habo le fete la habo nyeo. Batho ba tlang mapatong ha ba sa tlela nnete. Ba bang ba hlaha hole o sa tsebe hore lebaka ke ho tla tshedisa le ho pata, kapa ho itlela mabaka a hae. Ho bohloko ho fetisisa dibakeng tse ding, hobane o fumana mosebetsi wa lepato o kopanelwa. Ho etswa tsa bohetene, le tsa boKreste ka naka e le nngwe. Moruti o tla phetha karolo ya mosebetsi wa hae, mme hamorao, ngaka ya leloko, kapa hlooho lelokong leo e tla fihla le yona e etse tsa yona. Ka mokgwa ona ba kgothalletswa batho ho hlompha le ho tshaba badimo.

Baratuwa Moreneng, Pauluse o re ruta ditaba tse tharo, tsa bohlokwa tse fapanang le tse batho ba bangata ba phelang ka tsona mehopolong ya bona. Taba ya pele ke hore:

**MoKreste ha a lokele ho tshaba lefu**

**Bafu ba ithobaletse e le ka nnete**

**Tshepo hodima tsoho ya bafu e tiile ka ho sa feleng**

Ha re tadimeng meralo e meraro ena ka leihlo la moya.

## MoKreste ha a lokele ho tshaba lefu

Ke thuto ya BoKreste feela e rutang hore ha rea lokela ho tshaba lefu. Temaneng ya 55 eo re sa tswa e bala e re **“Na lefu, tsenene ya hao e hokae na? Wena lebitla, ho hlola ha hao ho hokae na? Tsenene ya lefu ke sebe, mme matla a sebe ke molao”**. Bahesong, mona moapostola Paulose o tsheha ka lefu. Mamela, ha a tshehe ka mofu, o tsheha ka lefu. O re lefu ha le sa na le matla. Kreste o re hloletse lefu. Lefu le ne le tshosa batho haholo. Le kajeno o fumana batho ba tshabang lefu haholo. Batho ba tshabang lefu ke ba sa itshetleheng hodima tsoho ya Kreste. Tabataba ke hore, moKreste wa nnete bophelong le lefung ha se wa hae ke wa Morena Jesu Kreste. Matsohong a hae re bolokehile! Ka tsoho ya hae, Kreste o ile a hlola senatla sena, lefu. Ka baka lena lefu la moKreste ha se kotlo ya sebe, tjhee, ke kgoro ya kganya e re kopantshang le Mmoloki wa rona Jesu Kreste. Ba bang ba bua jwaloka bahetene ba kgale, ba re **“a re thabeng, re jeng, re nweng, hobane hosane re a swa, mme ha o swele o swele”**. Weso o fositse. Tsoho ya bafu e teng!

Feela ha motho a swele, rona bao re phelang ha re sa na kopano le motho eo. Motho eo o phomotse. Ha a sa le bohlokong. Ha a sa teana le mahlomola. O emetse jwaloka rona letsatsi le lehlo leo Moahlodi e Moholo a tla hlahang ka lona. Re ke ke ra robala bohle, empa bohle ba tla kopana le Kreste ka tsatsi leo.

Jwale taba ena e re lebisa moralong wa bobedi:

## Bafu ba ithobaletse e le ka nnete

Na o dumela badimong. Ho na le batho ba reng; le Bibe le bua ka badimo. Ee, ke nnete, empa potso ke hore, Bibe le ena e buang ka badimo, e reng ka bona? Baena le dikgaitse, bontate le bomme, Bibe le ha ho moo e re rutang ho rapela kapa ho tshepa badimo teng. Bibe le e re hanyetsa ho sebeletsa badimo. Ka baka la tshabo ya lefu, batho ba se ba dumela hore hona le meya e tsamayang hara masiu, e tlang bathong ka tsela ya toro kapa pono. Moya oo o bua le wena mme o o laela hore o etse hona le wane hore o tle o atlehe. Oho hle ngwaneso, bafu ba ithobaletse e le ka nnete! Ka baka la letswalo lena, ke moo re fumanang mapato ana a phahameng. Weso, Pauluse o re mmele o wa bola, o wa senyeha. Mme ha o bala ho Moeklesia 9: 10, o fumana mantswe ana a matla a reng: **“Tsohle tse fihlelwang ke letsoho la hao hore di ka sebetswa, o di etse ka matla a hao; hobane nqalong ya bafu moo o yang, ha ho sa le mosebetsi, leha e le morero, kapa tsebo, kapa bohlale”**.

Ka baka lena ngwaneso, ha o le ho Kreste o sebopuwa se setjha. Ha ho na moya wa badimo o ka fihlang ho wena o ka reng o o etsetse *mpho ya badimo*. Ha o hlolehile ke ho etsetsa motho molemo a sa ntse a phela, o nahana hore o tla mo fepa jwang a swele. Thusa motho a sa ntse a phela, fepa motho a sa ntse a phela ha o na le matla ao. Apesa motho a sa ntse a phela ha o na le bokgoni bo jwalo. Oka/ fodisa motho a sa ntse a phela, ha o nale tsebo e jwalo. Se ka emela lefu hore le fihle pele, ebe hona o ratang ho thusa. Bibe le ha e re rute ho bua le badimo. Wa rona Modimo o mong feela, ke yena eo re dumelang ho yena. Ke yena feela ya nang le mantswe a bophelo. Ke ho yena feela re ka fumanang katleho le mahlohonolo. E seng bafung!

Ha o ne o lakaditse ho etsetsa mofu molemo, mme wa sa ka wa fumana nako, kapa wa hloka

bokgoni ba ho etsa jwalo, etsetsa ba ntseng ba phela molemo oo. Modimo ke yena ya tla o putsa.

Seo o se etsetsang ba hloakang, o se etsetsa Modimo. Yena o tla ananela ketso e ntle yeo.

## **Tshepo hodima tsoho ya bafu e tiile ka ho sa feleng**

Feela jwalokaha lefu e le nnete e senang ho hanwa, le tsoho ya bafu e jwalo. Kgaolo e re sa tswang ho e bala, sepheo sa yona ke ho re tiisetse taba ena: Tsoho ya bafu yona, e teng! Phuthehong ya Korinthe, le bathong ba bangata hara rona, ba ne ba sa dumele tsohong ya bafu. Mona Pauluse o tshwarahanye le pelo ya Evangedi. Bahesong haeba Krete ha a tsoha e le ka nnete bafung, Pauluse o re; **“tumelo ya lona ke lefeela, mme le sa le dibeng tsa lona. Ha ho le jwalo, ekaba le ba ithobaletseng ho Krete ba timetse (17-18)”**. Na o teng hara lona ya sa dumeleng tsohong ya bafu? Haeba a le teng, ho bolela hore motho eo ha a amohele hore Krete o tsohile bafung.

Pauluse o hlalosa tsoho ya bafu ka setshwantsho seo esitana le bana ba tla se utlwisisang. Lepato le re hopotsa ka lefu. Pauluse o bua ka molemi ya jalang peo, mme ka setshwantsho sena o rata ho re ruta hore bophelo ba motho ha bo felle lebitleng. Ha o jala, ha o paki lefu, empa o paka tebello ya bophelo bo botjha bo tla hlahang. Ka mantswe a mang ha re lahle peo ena mobung hore re e lebale. Re jala peo hore e hole mme e behe ditholwana!

Ka mokgwa ona, Pauluse, o re mofu o tshwana le peo ena. Ha re pata mofu, re jala *peo* eo Modimo a tla boelang a e tsosa ka letsatsi la bofelo. Ho ya temana ya 42 le 43 re jala ho bolang, hore ho tle ho tsohe ho sa boleng. Re jala ho timelang, hore ho phele ho sa timeleng. Re jala ho fokolang, hore ho tsoho ho mmatlafetseng. Bophelo kamora lefu e tla ba bo thabisang, mme ha re se hloleng re tshaba lefu!

Ka tsatsi la bofelo ha terompeta e lla, bafu bohle ba tla tsoha. Le bao eleng kgale ba patilwe, ba tla tsoha. Mme e mong le e mong o tla ahlolwa ho ya ka diketso tsa hae. Ke feela Modimo ya ka etsang ketso ena e makatsang!

## **Bokhutlo**

Bahesong, Modimo ha a lebale bao eleng ba hae. Rona re tsamaya re lebala bafu ba rona. Ebile ba bang ba neng ba sa bapale karolo e bohlokwa maphelong a rona, re ba lebala ka pele le ka ho fetisisa. Modimo ha a lebale bana ba hae. Bohle re tla tsoha!

**“A re leboheng Modimo ya re neileng ho hlola ka Morena wa rona Jesu Krete! Ka baka lena, banabeso ba ratwang, tiyang matla, le se ke la sisinyeha, mme le nne le eketse kamehla ho sebeletsa Morena, le ntse le tseba hoba mosebetsi wa lona e ke ke ya eba wa lefeela Moreneng!”** (temana 57-59.)

Amen!



The cover page

Buka ya dithero

Modimo o bua le rona ka nako tsohle. Na rea mo mamela? Kapa re lebeletse Modimo a hlahe lehodimong ka boyena a tle ho bua le rona? Kapa re tshwana le morui ya kileng a kopa hore Modimo a mo romele lefatsheng hore a tle ho bolela batho ka bohloko ba dihele?

Tseba le wena hle ngwaneso hore Modimo o rometse Moshe le baporofeta ho bua le rona. Se ka thatafatsa pelo ya hao ha o bala dithero tsena. Ke Lentswe le phelang le hlabang la Modimo, Lentswe le layang.

Ke thapelo ya rona hore bukana ena e balwe dikerekeng, malapeng le moo dithutong tsa Lentswe la Modimo di etsetswang teng. E se e ka Modimo a ka sebedisa bukana ena hlomphong le tlotlisong ya lebitso la hae le halalelang.

Die preekbundel

God praat met ons alle tye. Luister ons na hom? Of verwag ons dat God self moet kom en persoonlik met ons kom praat? Of wil ons soos die ryk man in die gelykenis van 'die ryk man en Lasarus' God vra om na die aarde te kom om ons te kom vertel hoe dit in die hel is?

Weet dan ook dat God Moses en die profete gestuur het om met ons te kom praat. Moet nie u hart verhard nie wanneer u hierdie preke lees nie. Dit is die lewende Woord van God wat steek en wat vermaan.

Dit is ons gebed met hierdie preekbundel dat dit in gemeentes, gesinne, Bybelstudie ens. gebruik sal word. Mag die Here hierdie bundel tot eer van Sy heilige naam gebruik.